
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google[™] books

<https://books.google.com>



RAZTOLNACHENYA
ZVERHU
VELIKOGA
KATEKISMUSHA

V U
CZESZARZKO - KRALYEVZKIH
DERSAVAH ZA NAVUCHANYE
ODLUCHENOGA.

N A V L A Z T I T O
ZA PODVUCHATI LADANZKO
LYUDZTVO Z-PRIDANEMI NA
KREPOZTNO DERSANYE KERSCHAN-
ZKO ZPADAJUCHEMI NAVUKI ZKUP
SZLOSENA Y NA HORVATZKI
JEZIK PRENESHENA

P O
JOSEFU ERNEZTU MATTHIEVITS

Kralyevzke Perveshne Skole Zagrebech-
ke Navuka Kerschänzkoga, y Historie
Szvétoga Píszma Navuchitelu.

Z T R A N II.
O d U f a n y a.

Z-dopuschényem Poglavárovo.


V U Z A G R E B U,

PRITIZKANO VU CZESZ. KRALY. SZŁOŁOD-
NOJ NOVOSZELZKOJ SZŁOVOTIZKI.

1 7 9 6.



***Ja pako ùfalszemsze vu te Gorpone:
rekelszem: Ti jeszi Bòg mòj: vu
rùkah tvojech szrecha moja. Psal.
30. v. 18.***



RAZLAGANYE PERVO.

Dél II. Od Ufanya.

R A Z D E L E N Y E I.

Kaj je Kerščànzko ufanye?

Perva dŭšnozt Bogochàztja je Vera. Vŭza, kojagod od oveh dŭšnoztih vam, lyubljeni Farniki! znati potrebnà jeszu, vu razlàganyah Ztràni perve vam obilno raztolnàchil jeszem, y vasz zadòzti podvùchil, kaj veruvati mòrate. Vezda prezrùpemo mi na drŭgi dél Bogochàztja, koi je ufanye. Ovo ùfanye je iztinzki pajdàsh Vere, je nepreczènyeni dăr nebèzki. Kajbi nam hàsznelo veruvati, dabi

Raztol. Kate. Ztran. II A 2 prez

prez ùfanya mòrali sivetì? Za lùdo bi nam Vera napervo poztàvlyala veszèlje Neba, ako ovo ùfatìsze nebi puztila, Nash ztàlish bibil obchinzkem nàchinom krùto nevòlyen, y falòzten, dapàche pun zdvojénnya, dabi mi prèz ùfanya sivetì mòrali. Prez ùfanya bi bili med vřzem ztvorjènyem naj nefzrech-nèshi. Ufanye podìse sizerdcze nashe, ako ono falozt tia do zemlve je zavàlila, ono zasfzadyùje sukkòchu vezdashnyega sfv-lènya, ono razveszelyùje nasz, y krèpi, kada nasz vnòge teskòche na pùtu krèpozti zmùche, ono nasz bàtrive chini, kada vnòge szuprotivchine nam falozt zavdàvaju, ono nasz zprevàdya tia do groba, y chini, da szmert miròvno chàkamo. Kak anda vam, moji dragi Farniki! vnogo vu tom poztàvlye-no bitì mòra, da vu ovoj Bogòchàztja ztràn-ki, koja na ùfanye Kerschànzko zpàda, do-bro podvuchìtesze, tak ovu prestimànu krè-pozt poznati, kak y czèlunye vrèdnozt ràz-meti? Ja iz moje ztràni hochu, kuliko naj-vech bude mogùche, terfzìtisze, vam z-po-mòchjum Bòsjum temelyitoga nàvuka od nye-ga napervo donèzti. Vi pako iz vashe ztràni nezkràtete meni ono pàzenye, z-kojem do vezda moja razlàganya posfzlùshali jezten.

Kaj

Kaj je Kerschànzko Ùfanye?

Kerschànzko ùfanye je zverhunaturalzka od Boga vlejàna krèpoz, z-kojum mi tvèrdno chàkamo od Boga vsza, koja nam je obèchal.

Krèpoz ovu Kerschànzkoga ùfanya dobivamo mi na szvètom Kerztu, gde nam nevidyenem nàchinom od Dèha szvètoga vlèvasze y podàje, y po kojoj mi vuztálisj poztàvlyamofze, y pòkladnozt dobivamo vsze ùfatísze, kaj nam je Bóg obèchal. Odovud zpe-lyàvasze, kaj je Kerschànzki ùfatísze.

Kaj je Kerschànzki ùfatísze?

Kerschànzki ùfatísze je tvèrdno od Boga chàkati, koja nam je obèchal.

Kerschànzki ùfatísze, od chesza ovde jedino je govorenje, neznamènuje szamo kakvugod zaùfanozt, koju chlovek vu lyùdeh, ali drugeh ztvàrih poztàvlyà. Zàizto nè, ovakvo ùfanye nevuchi nàsz nasha szvèta Vera, nego ona hoche y zapovèda, dasze mi jedino vu Gozpona, Boga nashega ùfamo. Kerschànzki anda ùfatísze znamènuje zaùfanozt vu Boga poztàviti, vsze dobro, budi telòvno, ali duhòvno, jedino od Boga chàkati, vu vszeh potrebochah nuternyeh y zvànakeh k-nyemu-

vtèchisze, z-tvèrdnem y iztinzkem zaufanyem vsza dobra od nyega zadobiti, koja nam je obèchal.

Naj prestimanèsha ztràn, vu kojoj mi poleg temeljiteh nàvukov Vere dobro podvùchatisze mòramo, je nashe ùfanye, ali ono, kaj mi od Boga ùfatísze mòramo.

Kajisze ùfamo od Boga?

Ufamofze mi od Boga sitek vekivèchni, to jèzt, vekivèchno blàsenztvo, y pomochi k-zadoblènyu prikladne.

Sitek vekivèchni, vekivèchna y najveksha cheztitozt Neba je ono, kaj mi za glavnù ztrànku ùfanya nashega imati mòramo. Chàzt, postènye, y szrecha jednòch zkupvàraschani Szvétczev, zkupòdvetniki Jesusha Kristusha y Szini Bòsji pòztati, jeszu ona, koja mi chàkati, koja mi pròsziti, y zverhu kojeh nashe ùfanye poztàviti mòramo.

Ovu tak veliku, Boga vrèdnu, y za nasz tak szrechnu, nàmeru nam nàpervoztàvlya Vera ùfanya nashega. Na ov czily y nàmeru jeszmo mi jedino, kak veli Apostol, zvàni: Bòg vsze milosche, koi mene zvàl je na vekivèchnu diku Vèlichànzstva szvojega. 1. Petri 5. 10. Da nasz na vekivèchnoga sivrènya ùfanye

fanye podigne, Jesush na szvét je doshel, nyegov návuk, nyegove pèlde, nyegova muka y szmert, vsze, kaj je govoril, vsze, kaj je chinil to izto szvedòche. Jedino vfi-vanye ovoga vekivèchnoga sitka vchini nasz zadovòlyne, y zvershèno szrechne. Ov anda sitek vekivèchni, ovo vekivèchno blàsenztvo je ono, kaj mi pred vszemi dugovànyi ùfatísze mòramo. Ali kajti ovo vekivèchno blàsenztvo zkupa je plàcha, koju mi zaszlùfiti mòramo, y takaj vsze potrebne nàchine potrebuvati, da ono zadobimo, anda nè szàmo ovo blasenztvo ztrànka ùfanyà nashega, nego takaj pomochi k-zadoblènyu prikładne. Naj oszebujnèshe pako pomochi jeszu, miloscha Bòsja, prez koje nikaj dobra, y za Nebo najemnoga vchiniti nemoremo, odpuztchanye nasheh grèhov, koji nam Nebo zapiraju, *vu koje nikaj zaszmradynoga, niti odurnozt zrokujùchega, niti làs nedòjde.* Apoc. 21. 17. Jedno pobòšno sivrènyè, koje vu zvershènom obdersàvanyu zapovedi Bòsje ztoji, od koje Krístush veli, da nyu obdersàvati mòramo, ako hochemo vu sitek vlezti: *hoches vu sitek vlezti, obdersàvaj zapovedi.* Matth. 19. v. 17. y obztòjnozt vu dobru do koncza. Ar Krístush veli: *koj do koncza obztoj, on bude zveshichen.* Matth. 10. 22. Pràvo ùfanye

Kerščànzko nadalye ztoji vu tom, dasze mi nè szamo jedino ùfamo zvelicheni biti, nego da mi Boga takaj za pomochi k-tomu potrebne krùto jàko proszimo, to jezt, dasze mi vu nashu laztovitu jàkozt, koja je mala y szlaba, nezàùfamo, nego pri Bogu nepreztàncze za pomoch milosche nyegove proszimo, da mi, akoszmò zagreshili bili, „ odpùztchanye grèhov nasheh po Jesushu Kristushu ùfamosze, y z-ovem ùfanyem objàcheni pomochi za odpùztchanye grèhov odrèdyene potrebujemo, da mi zapovedi Bòsje obdersàvamo; y od pùta nyih neodztùpimo, nego pri tom ztàlni do koncza obztojimo. koi pako zrok je ùfanya nashega.

Zakajfze ùfamo?

Mi ùfamosze, kajti Bòg vszamogùchi, vu xpunjavanyu szvojev obechànyih veren, nepreszèšno dober y miloztiven je, zato xpùiti more y hoche, kaj je obèchal.

Ufanye nashe zvelichitfze, y pomochi k-tomu potrebne zadòbiti, imaju szvòj temely vu obechàn yu, koje Bòg je vuchinil, da on nasz zvelichene vchiniti, y nam k-tomu potrebne nàchine dati hoche. Obechànya chlovechànzka nèszu nigdàr zadovòlyno tverden y szegùren.

ren temely, úfanye nashe vu ona poztáviti, Lyùdi vnogo pùti ne dersè, kaj obèchaju, nekuliko iz nevérnosztì, kajti nècheju, nekuliko iz nemogùchnosztì, kajti nemoreju. Drugach zevszèma je pri Bogu. Kada Bòg kaj obècha, tak moremo mi szegùrno, \ prez vszake pogibeli napèlyatisze, to úfatísze, kajti on vu szvoje obechànyih nepreszèšno veren, y za ona izpùniti mochi nepreszèšno mogùch, y za izpùniti hoteti nepreszèšno dober y miloztiven Bòg je. Prilòfemo anda ova k-dugovànyu, od kojega govòrimo. Bòg je nam obèchal fitek vekivèchni. Ovo nasz vuchi Vera, y szvétì Pavel ochivezto govori pishùchi ovak: *vu úfanye fivlènya vekivèchnoga, koje Bòg, koè ne lasè, obèchal je pred vremènih vèkov.* Ad Tit. 1. 2. Bòg szvoje obechànye, ako mi dobro fiveli budemo, za iztinzko izpùni, arje veren, zàto opomina Sz. Pavel, da mì vu nashem úfanyu tvèrdno obztojimo: *dèrsfemo valuávnye úfanya nashega nepremènyeno, ar veren je, koè je obèchal.* Ad Hebr: 10. 23. Bòg more szvoje obechànye derfati, Bòg more nasz zvelichene vchiniti, *ar vsza pri nyem jèszu mogùchna.* Matth. 19. 26. y kajti je Gozpon Nèba. Bòg hoche zadnich takàj szvoje obechànye zpùniti, y nasz zvelichene vchiniti, kajti
nepre-

neprefzšno je dober, y ova izta dobròta nyega giblye, da hoche vsze lyùdi zvelichene imati, *koi hoche, dasze vszi lyùdi zvelichiu.* 1. ad Tim. 2. 4.

Kada mi vsza ova dobro premiszlimo, lahko ràmeli budemo, da mi jedino vu Bogu naj jakshi temely úfanya izkati y nàjti moremo, y vu nikoga kak vu nyega tak veliku zaúfanost poztàviti nemòramo, budi duhovna ali telòvna potrebòcha. On je nam vsze obèchal dati, kaj Dùshi y tèlu je potrebno, kajti je veren, zkràtiti nèche nigdàr, dati nam, kaj mi ràzumno, y kerschènzki od nyega profzili budemo. On je neprefzšno dober, y nigdo nè za nasz tak dober, y za nashe dobro zkerblyiv kak on. On je Bòg vszamogùchi, koi vsza more, koi vsze kinche vu rùkah szvojev ima, y zviralische vszeh dàrov je. On jedino more nam pomòchi, y prez nyega nigdo. Pri lyùdeh nena hàdyamo mi takvoga temelya úfanya, ztopùti nemogu nam pomòchi, kada nam pomoch najboljè je potrebna, ztopùti nècheju pomòchi, ako akàj bi mogli. Pri Bogu pako niti menyka mogùchnost, niti vòlya. David, on Kràly veliki zpoznàval je ovo, zàto vu vszeh prilikah y pripechènyah svlènya szvojega úfalsze je vu Gezpòna.

Vute

Vute ufalfzemsze Gozpone, obshanyen nebudem nigdar. Pfal. 30. 1. zato ufanye nashe vu Boga mōra biti tvērdno y ztālno, vīzaku nezaufanozt, bojazlyivozt, szlaboszērdchnozt, najbolye pako zdvojēnye odhitāvati, ovo preporūcha nam krūto zaufano zpomenūti Krāly govorechi: najsze ufaju vute, koji pōznaju ime tvoje, ar nigdar oztāvil neszē one, kojiszute izkali. Pfal. 9. 10.

Najvekshem takāj grēshnikom nē zkrātcheno ufanye vu Boga. Puna zaizto veszēlja za vīze nash, kojiszmo zagrēshili, ali mozbiti y vezda vu grēheh nahādyamosze, iztina. Ar, kakgod veliki nashi grēhi bibili, zroka vendar imamo, vu Gozpona Boga nashega ūfatīsze, pri kojem je miloszērdnozt, y preobilno odkuplēnye. Pfal. 129. 7. y koi, kak Prorok Ezekiel veli, nēche szmertī grēshnika, nego dasze k-nyemu oberne, y šive. Ezech. 33. v. 11.

Mōramosze pak, akoszmo zagrēshili, pred vīzem hābati, da vu zdvojnozt neopādnemo. Chūvatīsze takāj mōramo, da zaufanozt nasha neobernesze na prevzētnozt, kōja jednāko kakti zdvojnozt, je grēh proti Duhu szvētomu, kojega mi šezē chinimo krivcze, ako odrēdyene od Boga Zvelichēnya pomo-chi zamudyāvamo, na obernēnye k-Bogu nigdar nemīszlīmo, ter vendar ūfamosze zvelichiti.

lichiti. Ako anda nashe ùfanye, koje, po-
klam zagrèshili jeszmo, vu Boga poztàvlyamo,
Kerschànzko biti mòra, takíze naj pervo ù-
fati mòramo, da pri Bogu oproztchènnye
grèhov zadobimo, ùfanye vendar ovo nasz
gibati mòra, dasze mi k-nyemu obèrnemo,
za grèhe nashe kajamosze, y pràvu pokòru
chinimo.

Po kakveh chineh zvershàvasze Ufanye Kerschànzko?

*Ufanye Kerschànzko zvershàvasze ofzebùjno po
molitvi.*

Molitva je zvershàvanye ùfanya, ar koi
za kaj profzi, mòra imati ùfanye zadobiti,
kaj profzi, prez ùfanya ovoga zaizto nebi
profzil. Kada mi anda Boga molimo, dàjemo
po tom znamènnye, dasze vu nyega ùfamo.
Ovde anda je naj prilichnèshe mezto od mo-
litve govòriti, ali da vasz dugo nezaderfim,
hochu vu ofzebneh razlàganyah od ovoga
govòriti. Za szada hochemo ovo razlàganye
dokònchati.

N a v ù c h a n y e.

Poztàvemo, moji lyubleni Farniki! vszu
nashu zaùfanost vu Boga. On je, komu
czèlo

czèlo nashe ùfenye dùšní ješzmo. Dùšno je nyemu, ar je Bòg. Bòg je, anda mùdrozti nyegvoj nikaj ne zkriveno, y mogùchnozti nyegvoj vsze je lahko. On je Bòg, anda najvekshi Gozpon zverhu vszega, zverhu zdravja y betega, zverhu szreche y neszreche, zverhu bogàtztva kak y zverhu sziro-màštva, zverhu sivrènya y szmerti; z-ovemi vszemi deli poleg szvoje vòlye. On je Bòg, anda vsze je dobro, mùdro y pravichno, kajgod chini. On je Bòg, anda znà nàjti nàchine y pomochi, koje lyùdi nàjti nèznajù; on znà szvetùvati, gde lyùdi vèch pomòchi nemogu, on more chudo chiniti, gde nàrav-zke pomochi, y chlovechànzke krèpozti zadòztnè nèszu. Moremoli mi nashu zaùfanozt takvomu Bogu zkrátiti?

Vu iztini, moji lyubljeni Farniki! zaùfajte-sze vu Boga, ovo je dùšnozt vasha. Alí takàj je veszèlje y cheztitozt vasha. *Blaseni ješzu vszi, koji ufajúsze vu Boga.* Pšal. 2. 13. Zaizto je neizgovòrna cheztitozt, kada' vi vu Boga ùfajùchisze vam rechi' morete: *Ti Gozpone ješzi ùfanye nashe, poztàvìšzi nam naj-vekshu obrambu tvoju.* Pšal. 90. 9. Premisze-te dobro ovu iztinu, ar je temely naj vugodnèshega pokoja, kojega vam vu ovom sivrènyu prezkerbeti morete. Bòg na vašz
mi-

miszli, kakgod priprozti jezte, ràvno tak,
 kakti na Velikàshe y Mogùchne zemèlyzke.
 Bòg miszli na vasz; akoprèm vam zlo go-
 díſze, ſziromàski jezte, y vnogo terpeti mò-
 rate. Akoprèm drugem bolye je nego vam,
 bogatèshi y ſzrechnèshi jeſzu, nego vi, zà-
 to vendar vech nevàlyaju nego y vi pri
 Bogu, y zàto nelyùbi vasz menye, nego
 nye. Bòg miszli na vasz; premishlyàvanye
 veſzelo! Vam anda nikaj nepripètchaſze vu
 vašem ſivlènyu, kaj iz nyegvoga otchinz-
 koga providyènya, y nyegveh dobrotivneh
 rùk nebi dohàdyalo. Ako vam je dobro, on
 je, kói vam dàlje; godíſze vam zlo, on je
 takàj, koi iz ztanoviteh nam neznaneh, vſzig-
 dàr vendar ſzvèteh, y za vaše dobro odlù-
 čeneh zrokov ono prepùztcha. Vi mòrate
 vu ſzrechi y neſzrechi Boga dichiti, y vu
 nyega úfatíſze. Vu ovom úfanyu ztoji prà-
 va mùdrozt chloveka, nyegov naj zvershe-
 nèshi pokoj, jeden pokoj, koi chloveka na
 pogled vſzeh ztvàrih zadovòlynoga chini, da
 nikaj vech neſeli, nego na vèk terpèchi po-
 koj vu Nebu. Amen.

RAZ-

RAZLAGANYE DRUGO.

Razdelènje II.

O d M o l i t v e.

S. I.

Od Molitve vu Obchinzkom.

Velika y zmosna Bogochàztja dùšnozt, od koje mi vu zàdnyem razlàganyu govorili je-
szmo, y koja vu tom ztoji, da mi ùfanye
nashe vu Bogu poztàvimo, od nash zpùnisze,
kada Boga molimo. Kada mi molitvu nashu
k-nyemu poshilyamo, kada nyega za miloschu
proszimo, kada nyega vu nasheh potrebo-
chah zazàvamo, po tom mi nashe ùfanye vu
nyega napervo dàjemo, y valùjemo, da od
nyega pomochi chàkamo, ar to zaizto nebi
proszili, dabisze neufali. Ovde anda je vla-
ztito mezto, gde od molitve govoriti mòramo.
Vu ovom Razlàganyu budemo govorili od
molitve vu obchinzkom. Proszim k-tomu
marlyivo poszlùshanye.

Razt. Kate. Ztr. II.

B

Vu

Vu chem ztoji molitva?

Malitva ztoji vu podiganyu sžerdca k-Bagu.

Moliti znamenuje, šzvoju Düşu, šzvoje sžerdce, šzvoju pamet, šzvoja mishlyènya k-Bogu ravnati, z-Bogom razgovàrjatiše. Nemoliše anda, kada chlovek vřzakojàchke molitve šzamo z-rechni zgovàrja, sžerdce pako k-Bogu nepodiše.

Zakaj molimo?

*Mi molimo, da Boga najvekshega Gozpona po-
leg dűšnořti pošlűjemo, y nè šzamo nyemu za-
hvalni jeřzmo za dobra prijeta, nego takaj
prořzimoga za budűch potrebna.*

Zakaj jořche molimo?

*Mi molimo takaj za oprořtchène grèhov, y za
pomoch vu obchinžkeh y ořzebneh, lařtoviteh
y bliřnyega našega potrebòchah od Boga iz-
prořziti.*

Pokehdòb vřzakojàchki zroki jeřzu, zbog
kojeh moliše, tak takaj jeřzu vřzakojàchke
fele molitve, ořzebűjnèshe zmed oveh jeřzu
chetiri šzledèche: 1. *Hvàla* iliti *vklànyanye*.
2. *Prořhnya*, 3. *Zahvalénje*. 4. *Aldov*. Kada
mi

mi Boga molimo, da mi nyega kakti najvekshega Gozpona vszeh ztvàrih zaradi szàmoga nyega, y zaradi nyegveh neprefszésneh zvershénosztih postùjemo, kada mi jedno szveto chudénýe y veszélje vu nami chùtimo, da je Bóg tak velik, pravičhen, dober, müder y szvét, kada mi nash nikaj pred nyim zpoznàvamo, y valùjemo, da nyegova Izvishnozt zverhu nashega ràzuma je, da mi nyegvo biťje prefzèchi nemoremo, y da on vreden je, daga vsze ztvorénýe dichí, tak ovàkva molitva, ali biva z-szàmem mishlyénýem vu szerdczu, ali zvàna z-rechmi, imenùjesze *Hvala iliñ vklànyanye Bogu*. Kada mi molimo Boga, da od nyega kaj zadòbiti moremo, kada nyega za oproztchénýe grèhov nasheh proszimo, za ószebùjne milosche y dàre, budi duhovne ali telòvne k-nyemu vtechemosze, tak ovàkva molitva imenùjesze *Proshnya*. Kada mi Boga molimo, da nyemu kakti pochetniku vszega dobra, za-vsza dobra prijeta, y koja neprezàncze prijemlyemo, nashu zahválnozt izkasùjemo, taksze imenùje *Zahvalénýe*. Kada mi dragovolyno nasha dobra, nashe telo z-szvojemí chutenýi nashu Dùshu z-szvojemí krèpoztni, nasha vsza chinénýa y terplénýa Bogu aldùjemo, molitva ova imenùjesze *Aldov*. Odovud vi-

dimo, da zroki molitve jefzu vnoğovèrztñi, y gibanye na molitvu nam nigdàr pomènykati nemore. Ar gdo zmed nafz, moji lyubleni Farniki, nema zroka providyènyu y praviczì Bòsjoj klanyatìfze, koje zvershenòzti vřzaki dòn vu nami pri vřzakojàchkeh pripechènnyah ofzebùjnem nàchinom vídiufze? Gdo zmed nafz vřzaki dòn pomochi Bòsje nè potreben od nyega profziti? Jeli jeden dòn prèjde, vu kojem mi nyemu za dobra prijèta zahvàliti nebi imali? Nemamoli vřzaku vuru priliku nyemu aldove chiniti?

Na kuliko nàchinov morefze moliti?

Dvojverztñem nàchinom morefze moliti, ali jedino znùtra, ali zkupa takàj zvàna; obodvojega nàchina navchilìfzmosfze od Apostolov.

Kakfze molitva zvershàya znùtra?

Molitva zvershàvasfze znùtra, kada jedino mishlènye pameti, y felya fzerdcza k-Bogu zdìgàvasfze.

Mi moremo Boga hvàliti, y z-nyim razgovàrjatìfze, akoprèm pri tom z-vùztmi nikaj negovorimo. On vdi y zpoznavà vu našoj pameti naša mishlènya, y znà felyu fzerdcza našega; nepotrebuje anda zvànzke rechi

rèchi za ràzmeti nasha nuternya mishlènya, y mi moremo jedino vu sferdczu z-nyim govòriti. Ova molitva zoveše premishlyàvanye.

Nàchin ov znùtra moliti iztina nè za vszakoga, ar prebùdyeno sferdcze vidíše potrebuвати, koje razszùditi, y' dugovànye ztemelyitem premishlyàvanyem zezvédati znà. Nistarmènye ov zaradi szvoje ofzebùjne hafzne vszem lyùdem, kojegagod ztálisha bibili, krùto preporùchaty y szvetùvatíše mòra. Vszaiki Kerfchenik, kojemu zvelichènye je dràgo, y iztinzko zvelichitíše hoche, mòra Dùshu szvoju od vszakoga grèha, koi nyu na vèk zkvàrjenu vchiniti more, chiztu chùvati. On mòra tulike pogibélne zányke y pechine, vu koje nyega ztálish nyegoy na pogled dùshnoga zpoznànya poztávlya, dobro pòznati, y od nyih chùvatíše, y hábati. On mòra znati, kaj je Bogu dùsen, kak szvoje dùshnoztì proti Bogu zpunyáva, jeli vu czèlom szvojem sivlènyu poleg temelyiteh návukov Evangeliuma, y zapovedi Bosànzke barache y five. On mòra Veru, koju valùje, navchitíše, y nye velike iztine ràzmeti. Ovo pako vsze, kaj vezda napervo dalszem, viszi - od premishlyàvanya. Zpelyávaše anda, da vszakomu Kerfcheni-

ku, vu kakvom goder ztálishu je, nikaj nè potrebnèshe, kak premishlyávanye. Prez ztavnoga y zréšznoga premishlyávanya Zvelichènya nebudesze nijeden chlovek chver-zto y zvéshlyivo za zvelichènye zkerbel; kaksze obderfi vu Kerschánzkoj nekriynozi, ako nema ztráha gréha vu szerdczu szvojem, kak pako ov ztráh gréha Dushi szvojoj doprinésze, ako vechkrát jáke giblyùche zro-ke, koji nyemu odurnozi gréha v-pámet za-biti mórajú, nepremishlyáva? Kak bude vu smútnye, y vnogovérztneh szvetzkéh poszleh, koji nyega raztreshènoga ch.nè, dùšnozi szvoje vszigdár pred ochmi imal, y nigdár od pùta pravice y lyùbavi neodztù-pi, ako vszako dugoványe pred Bogom nepremiszli? Kak bude vu tulikeh propaztjah, koje nyega od vszeh ztrán obztiraju, naj tu-robnèshe y naj neszrechnèshe pogibeli y neszreche bésal, akosze na vszekaj polécza? Kak bude vu zapovedi Bòsje zadozta vpùt-chen, da nyu véno y zvéshèno zpunyáva, ako nyu vu pameti szvojoj nigdár nepremishlyáva? Kak bude zpomenek izvisheneh Vere iztinitoztih, szùda Bòsjega, nyegovèh kastig, pomiluványih, nyegove zádnye ná-mere naj vekshega blášenztva, pekla, pri-nyem kaj hasznóvito opraviti mogel, ako
všza

všza ova nigdár nepremišli? Kaj anda z-
nyim bude? Ovo izto, kaj z-vnosinim lyu-
dih pripetchasze, koji iz pomenyke premi-
shlyávanya vu grěšnom neznányu siveju,
najvekshe hudobe chine, bitne dúšnozti za-
mudyávaju, ime Kerščenika nosze, nikak-
voga vendar temelyitoga znánya Kerščán-
ztva nĕmaju, koji kruto blúdna návukov
poztavja nazleduju prez vřzake zkerblyi-
vozti dúšnoga zpoznánya, y tak rávno z-
malem nepokojem na zkvárenye shetùju,
kak dabi po rávnom y szegúrnom pítu ho-
dili. Zbog ovoga zroka ja vař, moji lyu-
bleni Farniki! opominam, da gda y gda ha-
řznovita premishlyávanya vuchinite, potro-
shete vu tom koju vuru, koje vu Nedelyne
ali Szvetěchne dneve zvishega imate. Vze-
mite vu rúke jednu dobru knigu, chtějte vu
nyu, ali drugoga chtejúchega pošlúhnete z-
pazlyivoztjum, pri ovakvom chtěnyu nájde-
te vřzigdár ztvári, koje vam dobroga y ha-
řznovitoga premishlyávanya priliku dati ho-
cheju.

Kaksze molitva zversháva zvána?

*Molitva zvershávasze zvána, kada mishlěnya
pameti, y selya řzerdcza z-rechmi napervo
řtavlyasze, y ova molitva zovesze rechlyiva.*

B 4

Kaj

Kaj je paziti pri molitvi rechlyivi?

*Pri molitvi rechlyivi paziti je, da szerdcze ili-
ti Dusha chloveka ono miszli, hoche, y sely,
kaj rêchi molitve rechlyive znamennju.*

Moliti znamenuje z-Bogom govòriti; ako
chlovek kakti rázumno ztvorénýe govori,
tak zná kaj govori, y tak mishlénýa z-rech-
mi takaj zjedini,

Jeli takaj molitva rechlyiva hasznovita y potrèbna?

*Molitva rechlyiva je hasznovita y potrèbna, kaj-
ti iztoga molèchega na pobòsnozt izbudyàva,
y kajti druge, koji rêchi molitvene chigù, na
molitvu giblye, y nyim dobru pèldu dàje.*

Bogu nè potrèbno nasheh rêchih, da nasz
rázme, kajti nasha takáj mishlénýa nyemu
znana jeszu. Zaradi Boga anda nebi bilo
potrèbno, da mi mishlénýa pamèti nashe, y
selyu szerdcza nashega z-rechmi napervoztá-
vlyamo. Ali gledèch na nasz y blisnyega
nashega je hasznovito y potrèbno. Gledèch
na nasz, kajti mi pri molitvi rechlyivi boiye
moremo potrèbnu pazlyiyozt imati, ar mi-
shlénýa nasha pri rechèh laglye zkupzjedi-
nye-

nyena oztànu, Gledèch na blisnyega, koí, kada nasz molèche vidi ali chùje, po tom dobiva dobru pèldu, y jednàko takàj na molitvu giblyesze. Na ov czily vlaztito je molitva glaszna, obchinzka iliti zкупna naj prilichnèsha y naj szegurnèsha, Molitva ona, koja ochitno na glàsz vu Czirkvi zvershàvasze ima pred vszemi drugemi molitvami hászen dobre pèlde y naszleduvànya. Ovakva molitva je takàj naj chiztèsha, ar vu szebi szàme chizte, obchinzke y potvrèdyene proshnye zadersàva. Je takàj naj szegurnèsha, ar na czèlu Obchinu zpàda. Zàto nechinë, vlaztito pròzti lyùdi dobro, ako o-szebne molitve zvershàvaju, kada drugi zкуп y na glàz mole.

Zakaj potrebùjuszè Knige molitvene?

Knige molitvene potrebùjuszè, kajti Bogu povòly-na mishlènya, y szvèta poselènya zadersàva-ju, koja pri molitvi imati je potrebno. Hàsziuju takàj onem, koji potrebòche szvoje z-rechmi napervo porzàviti nemogu.

Kada mi z-Bogom govòrimo, nè potrebno, da rechi nashe poleg nàredbih szlofnogovòrnozti zкупszlofeneszu. Bóg napotrebuje czi-frazteh rechih, govòremo mi nyemu iztin-

zko y prôzto, kaj hochemo, kak y detcza chinè zaufano pri szvojem Otczu. Ovak molilje on Herczeg dojdúchi k-Zvelichitelu, y profzechiga, dabi Kcher nyegovu na sivlène prebudil: *Gozpone!* rekel je on: *Kchi moja vezda je vumerla, nego hodi, pozravi rúku tvoju zverhu nye, y bude sívela.* Matth. 9. 18.

Tak molil je on Ztotnik: *Gozpone! Szluga moj lefi vu hifi gutum vudren.* Matth. 8. 6. Tak on gubavi, koí nè drugo rekel, nego: *Gozpone! ako hoes, mores mene ochiztiti.* Matth. 8. 2. Metemtoga kajti jezero túpeh pametih nahàdyafze, koje malo miszliti, y ono, kaj miszle, z-rechmi napervo dati nè znaju, zàto nyim iznàjdyene jeszu molitvene knisicze, da po nyih na dobro mishlénnye dopélyaniszze bi mogli. Ove molitvene Knige mogusz z-hàsznum potrebuвати, mòrajusz vendar dobre y hafznovite zebrati, y dasze takve zberù, potrebno je zпамётне lyúdi tolnàcha pitati.

Jeszmoli dùsni moliti?

Dùsni jeszmo moliti, ar molitva je jedna zmed naj oszebujnèshek dùsnoztih Vere naše.

Mo-

Moliti je jeden način Bogochàztja y szlusbje Bòsjè, koja Bogu vu vszeh vremenah vu vszakoji Veri je izkàzana, y koju chlovek nyemu poleg temeljitoga nàvuka Vere nashe szvète izkàzati dùsen je. Poleg temeljiteh Vere nàvukoy dersimo mi Boga za nashega Pochetnika, koi nam bitje dàje, za nashu nàmeru y czily zàdnyi, kakti jedini mir y pokoj nash, mi zpoznàjemo nyega kakti najvekshega Gozponà zverhu vszega, kojega vszamogùchnozt vsza zdersàva, kojega providyènye vsza ràvna, mi verujemo, da mi od nyegvè lyublene dareslivoztì hranimosze, y po nyegvom providyènyu zdersàvamosze. Mi anda dùšni jeszmo, nyemu, kakti Gozponu zverhu vszega, nashu pokòrnozt izkàzati, nyemu kakti zviralischu vszega dobra zàhvalni biti, kaj prez molitve vchinitisze nemore. Mi vendar ovu dùšnozt moliti selimo josche bolye podvùchitisze y zpoznati.

Gdo zapovèda moliti?

Zapoved Bòsjà, pèlda y zapoved Krìstusheva zapovèdaju nam moliti.

Zapoved molitve je nedvojena zapoved. Jedna zapoved, koja vre predi, nego zapoved napiszana bibila, vu szerdczah chlo-
vechàn

vechànzkehi od Boga napiszana je bila. Kain y Abel aldùvaliszu vre Bogu od dugovàny, kofaszu pridélali y odhrànili. Gen. 4. Y Enofz Vnuk Adamov pochel je vre ime Bòs-je zazàvati. Kaj pako najboljé od dùšnozti moliti doprinèzti y poszvedòchiti mòra, je zapòved y pèlda Jesusha Kristusha nashega Bosànzckoga Navuchitela. Ov je nam moliti z-jedne ztrànì z-szvojemi rechmi, z-drugo ztrànì z-szvojemi naj szvetèshemi peldami za nezamudlyivu dùšnozt odrèdil. Z-szvojemi rechmi, ar nam ochivezto moliti zapovèda govorechi: *potrèbno je vszìgdàr nepreztàncze moliti.* Lucà. 18. v. 1. Z-szvojem lazto-vitum pèldum, ar on szàm vechkràt molilje y czele nochi vu molitvi potroshil. Dùšnozt mohiti ima szvòj temèlyiti zrok oszebùjno vu potrebochi nashega zvelichènya. Miszmo dùšni z-vszum marlyivoztjum, y vszemi nà-chini vsze pomochi potrebuвати, da nàsz vu szredini tulikeh pogibelih, z-kojemi obzterti jefzmo, pravèdne zderfimo, y tulikem pe-chinam, na koje ladja sivrènya nashega vsze-vdily zadetisze, y poginuti more, vu gnemofze. Med ovemi pako pomochlyivemi nà-chini ni jeden ne jakshi, y zevszèma potrebnèshi, kak molitva. Zakaj ovo? Kajti mi poleg nàràvzke nemogùchnozti, y jàko ve-
like

like gingavòche, koju vu nami nahádyamo, nam számi zadoztni nészmo, to jezt, kajti mi számi vszem zkushávanyam szuprotztáti, nész od vszeh pogibelih chùvati, vszem nashem potrebòcham na pomoch dòjti nemoremo. Nam anda potrebna je pomoch, ter k-tomu berza, mogùchna y vszevdilyna pomoch, koja je pomoch y miloscha Bòsja. Kak pako mi ovu pomoch zadobìmo? Po molitvi; ar tak nam Szin Bòsji raztolnáchil, y z-odper-temi rechmi rázmeti je dàl, govorèchi: *proszete, y hòcheszte vam dati.* Joan. 16. v. 24. Iz kojeh rechih poleg zevszèma szuprotiv-ne náredbe razmévamo, da, ako mi neproszimo, nikaj takáj nedobìmo, ako pak od Boga nikaj nedobìmo, tak nam pomoch zme-nyka; ako ove mentùjèmosze, taksze vu pravednozti nezderfimo, nego opádnemo, ako pak opádnemo, tak y poginemo, y ovo pogublénje nashoj lenozti pripiszati budemo mòrali, ar vu nami je ztálo prosziti, y tak nezkváritisze. Pokehdòb anda Bòg neche, dabisze gdo zkváril, hoche on, dasze mi k-molitvi vtèchemo, y to izto nam zapovèdal je.

Pokehdòb anda molitva za zvelichénje nashe tak jáka y potrebna je pomoch, tak mi nijeden dán prepuztiti nemòramo, da ne-

bi

bi kuliko molili. Naj bude pošel, kakov hoche, mòramo vendar konchemar vjùtro ztávshi y vecher zpát idùchi, pred y po jelu, y vu návadnom molitve vremenu kuliko tuliko moliti. Vjùtro ztávshi mòramo vu sizerdczu pred Bogom vsza vidèchem na kòlena hititísze, y nyemu tèlo y Dùshu, nashu detczu, nashe delo, y nasha vsza chinènya prikázati y aldúvati, mòramo dokònchati czèl dán pobòsno sivetì, nashe dùsnozti vèrno zvershávatì, y zàto Boga za potrebnu miloschu prosziti. Zpát idùchi mòramo Bogu za vsza on dán na tèlu y Dushi prijeta dobra zahváliti, y za grèhe nashe zkrùsheno posaluvatisze. Pred jelom y po jelu mòramo ochi y rùke nashe proti Nebu podichi, da naj vekshega Ztvoritela dichimo, koi nasz je ztvoril, y za nashe zderšávanye zkerbi, mi mòramo zpoznavati, da ono, kaj vsivamo y troshimo, je dobro milosche nyegove, da je dár rùk nyegoveh, y da mi vsza od nyega kakti Pochetnika vszega dobra imamo. Kada pako ove szada imenuváne molitve zvershávamo, to nemòramo chiniti iz száme návade, nego vu Dùhu y izti ni, z-pazlyivoztjum y dobrem nakáneniyem. Vu oneh dnèveh, kada szmo od pošzlov bolye prozti, najmre po Nedelyah y Szvétkeh mòramo vech

vech vremena vu molitvi potròshiti, ar ovi dnevi ofzebùjno na to odlùcheniszu. Vu obchinzkom mi mòramo vu vszeh nasheh potrebochah na tìlo ali Dùshu zpadajùcheh k-Bogu po molitvi vtechisze, po tom mòramo vu dvojne tolnácha, vu ztizki sferdchenò hatrivenye y nagovàrjanye, vu szili pomoch izkati. Iz ovoga budemo mi ochivèztnu hafzen imali, ar Boga nigdár zabztùny nezazávamo. Zpoznal je to Kralyevzki Prorok David, onsze je vu vszeh szvojev szuprotivchi nah y nevolyah, od kojeh niti Bat, niti Koruna Kralyevzka nyega neszu proztoga chinila, k-molitvi vtekel; vu nyoj nashel je szvoju obrambu, szvoj pokoj y veszélje. Szvedochánztvo ovoga oztavil je szám govorèchi: *Z-rechjùm mojum krichalszem k-Gozpomu, y poszliùmulje mene.* Psal. 3. v. 4. Zato takáj Sz. Jakòb Apostol daje nam óv lèpi návuk: *ako gdo zmed vasz je szlozhen, naj moli.* Jac. 5. 13.

Iz onoga, kaj gore od dùšnozti, y potreboche molitve rekel szem, neizpelyávašze, kajši vi. moji drági Farniki! dobro zapamètete, daszi mi iz molitve delatni dán napraviti mòramo. Számomu szebi vnosinu vszagdashnyeh molitvih nadpoztáviti, y natòsze chvérzto vèzati, niti morete, niti je szmeti, aríze

aríze to z-vnogovèrztneimi dùšnoztmi vashega ztálisha szłofiti nemore, dasze one nebi zamùdile. Czèł dán vu molitvi potròshiti vtrùdi szerdcze, y poztáne návadno, prážno, y mangujúche poszluványe. Kada Krištush veli, da mi vszigdár ý nepreztáncze moliti mòramo, tak ovu zapoved zvershimo, ako mi nashe dùšnoztì marlyivo zpùnimo, ako mi nash vu nashem ztálishu pòleg zvánja y vòlye Bòsje z-poszluványem zabávlyali budemo, ako mi nashe hišno ali polyažko, ali kakgod imenuváno delo, nashu Várasku y Gozpodzku szłusbu, nashe terštvo y vsze poszle Bogu z-chiztem y iztinzkem nakanènyem aldùvali, y chinili budemo, kajti Bòg pòleg ztálisha, vu kojem nash je poztavil, tak hoche imati, vsze ovo znamekuje moliti, znamenuje z-chinmi moliti, znamenuje náchinom zvershlyivem moliti, kajti mi Boga zkupa postùjemo y giblyemo, da nam szvoju miloschu, koja je szád molitve, podeli. Ovo za vasz, drági moji Farniki! v-pámet vzeti je krùto veszelo, koji vu ztálshu jezte, vu kojem vekshu ztrán vremena z-hišnem, ztálisha y zvánja vashega poszli obtershemi jezte, da vam chizto malo vremena zvishega oztáje za molènye.

Mi nemòramo, kada molimo, miszłiti, da
nasha

nasha molitva vu szebi szama tak najemna bi bila; dabifze Bogu dopazti mogla; y dabifze on po nyoj genuti mogel; nash poszlühnati, nego znati mōramo, da molitva nasha vrēdnozt szvoju zevszēma iz zaszlusēny Jesusha Kristusha ima, koi nashu molitvu po szvojem mogūchnom zagovárjanyu pri szvojem Otczu nebēzkom zderšati, y nyemu drāgu y povōlynu vuchiniti mōra. Zāto mōramo mi, kada k-Bogu Otczu vekivēchnomu nashu molitvu poshilyamo, nyega vszigdār po zaszlusēnyah Jesusha Kristusha Szina nyegvoga prosziti, to jezť: mi mōramo vu imenu Jesusha moliti.

Vu chijem imenu mōramo moliti?

Kada mi Boga Otcza nebēzkoga vu imenu nyegvoga naj lyublenēshega Szina, vu kojem on naj vėkshu dopādnozt ima, proszimo, z-tēm predi genešze, da nash poszlühne. Zarad ovoga szām Jesush Kristush nash szegurne chini, govorechi: *ztanovito, ztanovito velim vam, ako vi Otcza mojega kaj vu imenu mojem proszili budete, hoche vam dati.* Joān. 16. v. 23. Vŕze dobro, vŕze milosche y dobrochinstva, z-kojemi nash daresliiva ruka Ztvoritela obilno darūje, zadobivamo mi po Jesu-

Razt. Kate. Ztr. II.

C

sha

shu Kristushu Gozponu nashem. Zpoznáva ovo dobro Czirkva nasha szvétà, vkaniti nemogucha Navuchitelicza, koja tuliko pùti, kada molitvu szvoju k-Bogu Otczu rávna, to chini po Jesushu Kristushu.

Pri molènyu víze vu tom ztoji, kak mi molimo. Ovo nash vuchi Sz. Jakob Apostol, koi potverdyáva, da, ako nash Bóg neposzlúhne, to biva, kajti dobro nemòlimo. *Vi profzíte, y nikaj nedobivate zàto, kajti zlochezto profzíte.* Jac. 4. v. 3. Anda potrebnò je, da vasz, dràgi moji Farniki! temelyito podvuchim, kak mòrate mòliti.

Kak mòramo mòliti ?

Mi mòramo z-poniznem y zkrùshenem szerdczem, vu Dùhu y iztini, z-tvèrdaum Verum y zàufanyem mòliti.

Mi mòramo z-poniznem szerdczem mòliti.

Moreli biti kaj zpametnèshega, dapàche nàravi zpodobnèshega, kak z-poniznem szerdczem mòliti ? Moreli chlovek prav ràzmeti, kaj je molitva, ter vendar molech zàbiti, szebe poniziti ? Kada mi Boga za kaj profzimo, tak valújemo mi po tom pred nyim nashu nevolju, szlabòchu y potrebochu, y
dohá-

doňadyamo pred nyega kakti ſziromàski y pomochi potrebnì. Kakſze anda zкупſziàſe gizdozt y ſziromàſtvo? Kakſze pogàdya ohòlno ſzerdcze z-jednem ponizno proſzechem? Bòg nikaj bolye neodurjàva, kak gizdavoga ſziromàka: *jednoga ſziromàka, koì je gizdav.* Sir. 25. 4. y nyegova molitva Bogu griztiſze; ponizno pako ſzerdcze Bòg nezamètche. Kada mi anda molimo, tak mòramo pred Bogom nashu nevrédnozt, nashu laztovitu ſzlabòchu valúvati y zpoznàvati, mi mòramò onò; kaj od nyega proſzimo, kakti miloſchu, nè pako kakti dùg premishlyàvati. Z-ovem nuternym poniznem nakánenym mòramo takáj zvànzku dersànya poniznozt ſzloſiti, kaj proſzechemu priztojiſze, mi mòramo nè drugach, kak ſzloſnem y chednem tela dersànyem, ali dòztojuo ztojèch, z-podignyenemi y zкупzklòplyenemi rúkami, z-ochmi ali vu zemlyu vuper temi, ali vu Nebo podignyenemi, ali vu Oltar, ali vu knigu molitvenu gledèchemi mòliti. Prevzèrno y razpùztccheno dersànye obraza, prokshenozt ochih, y vnòga druga nedòztojna dugovànya, koia z-veksàlìnum nashu molitvu zprevàdyaù, giblyu rvega, me-zto toga, dabi naſz poſzlùhnul, vnogo bolye na kaſtiguvànye. K-tomu, da mi, kada

C 2

mò-

mòlìmo , tak zvána dòztojno y ponizno dersánye káfemo , kak takáj znùtra ponizna nakánenya vchinìmo , vnogo pomore , ako mĩ nasz pred molitvum vu nazochìbitju Bòsjem poztávìmo , to jezt , ako mĩ nam sìvo pred ochi poztávìmo , dasze pred liczem Boga nahádyamo , da on nasz gledi , da na nashe zvánzko dersánye pazi , y da nyemu naj zkròvnèsha mishlènya szerdcza nashega zna-na jèszu.

Mi mòramo z-zkrùshenem szerdczem mòliti.

K-jednoj Kerscháanzkoj molitvi je zevszèma potrèbno , da , ako iz temelyito chiztoga y pravichnoga szerdcza zvershávatìsze nemore , konchemar vu ztálìshu pokòrnoga szerdcza chlovek nyu zversháva . Kada mĩ za tèm hochemò mòliti , tak mòramo predi nashe dùshno zpoznánye pred Bogom iztinzko zezvèdati , y akosze vu ztálìshu vlaztito fzmertnoga grèha nahádyamo , mòramo ponizno pred Bogom nashe grèhe valúvati , nye odurjávati , za nye iz szerdcza salúvatìsze , y nakánenye imati pobòlshatìsze .

Mi mòramo vu Dùhu mòliti.

Vu Dùhu mòliti znamenuje z-pazlyivòzt-jum Dùshe y nágnenyem szerdcza mòliti.
Pa-

Pazlyivozt ova Dúshe y nágnenye szerdcza. Je Dúsha molitve, prez koje ona tak dobro ztáti nemnre, kakti tĕlo prez Dúshe, koja ono sivetí chiní. Molitva je rázgovor z-Bogom, pri kojem Dúsha z-Bogom razgovárjaše, y nyemu szvoje potreboche napervo dáje. Vízę ovo poztávlya napervo jedna pobósnost, nuternye gibanye, y pazlyivozt szerdcza. Ako anda szerdcze nashe vu onom hipu, kada z-Bogom govórimo, tak je raztrĕsheno, da mi pazlyivozt dragovolyno pogubimo, ako mi nashu molitvu z-nepazlyívem y hmányem mishlénym zgovárjamo, ako vusznice giblyemo, szerdcze pako nashe ono, kaj z-vúztmi zgovárjamo, nezna, tak ovo nè molitva, y vrĕdni jefzmo ono zpochitávanye od Boga chuti, koje Kristush je chinil Fariseushem: *Lyudztvo ovo poslúje mene z-vuztniczami, szerdcze pako nyihovo je dálko od mene.* Matth. 15. v. 8.

Mi mòramo vu iztini mòlti.

Ovo hoche tuliko rechi: mi mòramo práva y ztálna dobra, od kojeh nashe bláshenztvo vífzi, pred vízemi drugemi od Boga profziti, n. p. jedno neozkrúnyeno sívlénýe, dohru vĕzt, poníznozt, sívu Veru, iztínzku lyúbav blíšnyega, pokórnozt proti Poglává-

rom, felyu za izpuniti dúšnozti nashe, milošchu, da poleg nashaga ztálissha y zványasívemo, y vřze, kaj Dúshu nashu šzvétu, y bláśenu vehiniti m re. Bláśenzvo je nash naj preštimaněshi, dapáche jedini Czily y konecz, za kojem mi hlěpeti, y kolega zadobiti terřzitiřze mōramo, ar poveksháva diřku Bōřu, y nasha jedina je řzrecha, anda mōra takaj naj preštimaněshi czily nashe řelye y molitve řiti. Ono nōřalcři řiti, ali ř řřlozt l pri najvekřhoj řtránki Kerřchenikovę. Ar kaj lyđi najveř prořze? Povekřhávanye blága y imětka, da řzrecha rázte, obchůvanye zdrávja, ali řřzlobodyěnye od řakvoga betega, y ovem zpodobna. Ja řevřzema nevelim, da řhlovek za řemělyřka dobra Boga prořziti nemōra. Čzirkva řzáma pro ři, da nam řakova řodělitl dōřtoja. Ova vendar prořziti mōramo, poklam predi, y řed vřzemi dugoványi řuhōvna dobra prořzili řeřzmo.

Mi mōramo ř-tvěrdnum Věrum y řařřfanořřnum mōliti.

Vlážtitōřt ovu, da mi vu Věri, y prez naj menyshe dvojne mōliti mōramo, řepořřcha nam řhvěřzto řzvěti řakob: naj řako prořzi vu Věri, y řikaj ředvoři. řac. 1. 6.
Bōg

Bog hoche, da nè szamo poleg milofzèrdno-
 zti nyegove ovem náchinom nyega zazáva-
 mo, nego takáj szám qvoj Veri y zaufanyu
 vu dozta mezteh szvétoga Píszma pripishùje
 chudnovitu krépozt molitve, ar k-onem, ko-
 ji k-nyemu vteklíszufze y nyega zazávali,
 rekel je, da Vera y zaufanozt nyihova nyim
 je pomogla: *Vera tvoja je tebe zdravu vuchini-
 la. Lucz 7. 50. Kristush takaj nash szegúrne
 ehini, da vu Veri molèchi vsza od Boga za-
 dòbiti moremo: y vsza, kojagòder profzili bu-
 dete vu molitvi verujùchi zadòbiti kochete.*
 Matth. 21. 22. Vera ovà y zaufanozt mòra-
 ju ztálna biti, to jezt, namsze nemòra grù-
 zteti, ako mi vechkrát y dugo za kàj mòliti
 mòramo. Guztèsha proshnya nemòrasze nam
 privèdyati, niti neterplivne nash chiniti.
 Dári Bosánzki, koje profzimo, jeszu drági y
 dozta vnogo vrèdni, da vechkrát za nye
 profzimo. Ovo je návuk Proroka, koj nam
 vell, da mi zakešznènye Boga terplivno po-
 dnáshamo: *ako Gozpon zakešzni, ztálen budi.*
 Hab. 2. 3. Bog vu tom chini z-nami, kakti
 Otecz z-szvojum detczum, koju puzti dugo
 profziti, kajtiju okol szebe rad íma y vidi,
 kojabi taki od nyega odishla, dabi nyim ta-
 ki dál. Ako nasha molitva prez hafzne
 prèjde, chùvajmosze, dabi záto proti Boga
 C 4 morgù-

morgùvali. Mi mòramo miszliti, Bòg zna hollye, kaj je nam potrebno, kak mi znati moremo, on je nam proshnyu nashu zkrátil, kajti poleg mùdreh náredbih providyènya szvojega vidi, da nam nè hasznovito.

Ovde zpomenuti mòram, da mi nemòramo vszaki szamo zasze, nego za vsze lyudi mòliti. Na to opomina náš Sz. Jakob go-vorèchi: *mòlete jeden za drugoga, dasze zveli-ehite*. Jac. 5. 16. Odkud za jedno zpozná-vamo, da mi, kada za druge mòlimo, osze-bujno nyihovo zvelichènye, y kaj nyim k-tomu je potrebno, za námeru imati mòra-mo. Vlaztito pako mi mòramo za nashe szvetzkè y duhovne Poglavàre mòliti. Ovo zapovèda szveti Pavel: *opominám anda vasz, da vszeh proshnye, molitve, molybe, zahval-nozti najpervich bivaju za vsze lyudi, za kralve y za vsze Poglavàre*. 1. ad Tim. 2. v. 1. 2.

Pokehdòb Czeszar nash najvekszi Pogla-vár, nash zapovedajúchi Gozpon y Szamo-ládavec je, tak mi kakti nyegovi podlofniki dúfni jeszmo oszebujnem náchinom za nyega mo-liti. Kerscheniki pervoga ztolètja oztáviliszu nam ovoga dugoványa lépu pèldu, koju mi na-szledovati mòramo: *Mi zazauamo, pishe Tertulian vu ime Kerschenikov, vekivechnoga, právoga, y sívoga Boga za daber y szrechen zta-*

ztálish Czeszarov, koi nyim sivolénye y kralyuvanye je däl, y koi jedina zverhu nyih oblazt ima, y z-nyimi lada. Ov izti Piszecz szvedochi: da Kerscheniki Boga prosze iz czeloga szerdca za Czeszare, da nyim Bog dugo sivolénye, mirovno ladanye, verne Tolnachnike, szerdchene szoldate, pokorne podlosnike, y vsze, kaj jeden chlovek y Czeszar seleti more, podeliti doztoja. Y nazopet vu drugom meztu pishe: mi molimo ne szamo za nasz, nego takaj za Czeszare, za nyihove Dvorjanike, za dersavih ofzebne Poglavare, za dobro czeloga Orszaga, za mir y szlosnozt Kralyeztva.

Ako anda Kerscheniki perve Czirkve zpoznavaliszu za dufnozt moliti za Kralye y Czeszare, kojiszu bili Poganini y Bolvanini, y koji nye naj kervolochneshe preganyaliszu, kak anda vnogo bolye nasha dufnozt je, za Kerschánzkoga Czeszara moliti, za jednoga Czeszara, koi nasz bráni, lyubi y nash Orecz je? Mi moramo Boga, koi je branitel vfzeh Kralyeztvih, najmre pako Kerschánzkoga Czeszárztva, prosziti, da on Szlugi szvojemu nashemu Czeszaru dati doztoja, da on Bosánzku jákozt, po kojoj on preobladuje, zpozna y dichi, y da on pod obrambum Boga, po kojega odrédyenju on Szamoládavecz je poztal, vszigdár moguchen bude. Moramo

takáj za Kralyevzke vekshe y menyshe Poglaváre Boga prosziti, da oni Szamoládavczu věrni, y za dobro podlošnikov zkerblyivi budu. Nadalye důšnišmo za Papu našeha najvekshega Páztira y Nameztnika Kristushe- voga na zemlyi móliti, da nyega Bóg po milošzěrdnoztí szvojoj na púte vekivěchnoga zvelichěnya rávna, da on po nyegvoj pomo- chi, k j nyemu povólno je, potrebuвати, y zvershlyivo zpúniti more. Móramo takáj za Biskupe y oztále duhovne Páztire, ofze- bújno za one, pod kojeh Biskupium, y du- hovnum zkerbjum ztojimo, móliti, da oni szvoju duhovnu cházt dobro y vrědno ob- vershávati mogu. Nadalye móraju detcza za szvoje Roditele, ovi pako za szvoju det- czu móliti. Móramo takáj pri našoj molitvi iz dobrochinitelov našeh zpoměnutiše, y Boga za nye prosziti, da on nyim za vólju imena szvojega vekivěchno fiviěnye daruje. Josche nadalye móramo mi za vsze preminu- che věrneh Keršchenikov Dúshe móliti, da Bóg nyim pokoj vekivěchni podá. Od mo- litve, koju mi za preminúche činímo, veli Sz. Pišzmo odperto, da je szvěto y hafzno- vito: *Za preminúche móliti, je szvěto y ha- fznavito mishlěnye; dasze od grěhov oszlobode.* 2. Mach. 12. 46. Zapověda nam takáj Kri- stush

Isush nash Gorpon y Zvelichitel, da mi za nepriatele nashe, y nash zbántujúche móliti mòramo. *Molate za one, kaji vash pregányaju y bántuju.* Matth. 5. 44.

Chlovek more doma, ali takáj drugde móliti. Bóg je vsígder nazochi, y more vu vsíakom meztu onoga poszlúhnuti, koísze k-nyemu vtéche. Czirkva vendar je lazto-vito, y za molitvu oszebújno mezto, gde Bóg bolye nego drugde Tronush szvojega Velichánztva y dareslivozti podignyen ima, da potreboche lyudztva szvojega poszlúhne. One pako Czirkve oszebújno za molitvu pred-poztavitísze mòraju, gde vtelóvlyeni Szin Bósji vu szvétom oltarzkom Shakramèntu zadersavašze, ar onde nasha pobóšnozt y zai-fanozt z-tém bolye povekshavašze, ako mi na ovu tak zmošnu zkrovnnozt miszlimo, koju Isush Krístush kakti naj odpertéshe y najvek-she znaménye szvoje lyùbavi proti nam, y kakti zalog zvelichénja nashega je poztavil. Najvech pako chlovek mòra szvoju laztovitu Farnu Czirkvu za molitvu zbirati, y nyu vszem drugem predpoztaviti, ar ova je za nash odlúchena y poszvètchena. K-nyoj je-dino mi zpadamo; vu drugeh Czirkva mi je-szmo kakti ztranzki, y ovcze, koje szebi odlúchenu ovcharniczu oztavilešzu, y vu tù-gyu. .

gyu, kam nezpádaju, vrinutifze hocheju. Fárna Czirkva je vlaztito hifa, vu kojoj Bóg za nasz ztanúje, koju on zbira, da ime nyegovo onde na véke prebiva, y nyegove ochi y nyegovo szerdcze vszigdár oztáne za pomòchi nam vu potrebòchah nasheh. Ovdé hoche, dasze pred nyim zkupzprávimo, nyega proszimo, y nashe potrebòche pred nyega poztávimo. Ovdé hoche nasz poszlúhnuti: *ochi moje budu odperete, y vùha moja budu podignyena na molitvu onoga, koi na ovom kerztu bude mólil.* Paral. 7. 15. Iztin-zko anda y nedvòjeno je, da G. Bóg vu szélzkoj Czirkvi, vu Fárnoj Czirkvi vam tak blizu je, y tak pripraven vasz poszlúhnuti, kakti vu kakvojgód naj glaszovitèshoj Czirkvi. Kaj pako vasz, moji drági Fárniki! jofche vech genuti more, da Boga vu vashoj Fárnoj Czirkvi mólite y proszite, jeszu oszebùjna dobrochinztva, koja vam vu nyoj je izkázal. Vasha Fárna Czirkva je, vu kojoj vi po szvétom Kerztu vu Czirkvu Jesusha Kristusha jezte prijeti, gde vi Szini Bòsji y Odvetki nyegvoga Kralyeztva jezte vchinyeni, gde vi podvùchanye vu Kerscháantzvu prijemlyete, gde vszaku Nedelyu y Szvétek naj szvetèshi Aldov Sz. Meshe za vasz zvershávasze. Ako vi vsza ova premiszlite, tak

tak lahko rázmelli budete, da vashu Fárnu
Czirkvu vízem drugim predpoztáviti mórate.

Gdefze ona, za koja mi prosziti móramo,
zadersávaju?

*Vsja ona, za koja mi prosziti móramo, zadersáva-
juszé vu Otec z nashu, to jezť: vu Molitvi
Gozponovoj.*

Zverhu ove izvishene y prestimáne moli-
tve budem ja nekoja razláganya derfal. Za
danafz hechemo ovo dokonchatí.

Navúchanye.

Bóg veli po Proroku Zakariashu: *Ja ho-
chu razlěati Dúha molitve zverhu ztanovnikov
Jeruzalema. Zachar. 12. 10. Proszete vi o-
voga Dúha molitve, kol vam tak potreben
je. Proszete Boga, da vam oszebújno ná-
gnenye na molitvu podělití, lyúbav proti
nyoj vu vami izbúdití, y nyu vam drágu y
povòlynu vuchiniti dóztoja. Zadnich josche
hochu ovde vafz Roditeli zarád dúšnozti va-
she opoménuti, koju vi vu tom na pogled
detcze vashe imate, y, koja vu tom ztoji,
da vi detchiczu vashu od detinztva k-moli-
tvi privúchate. Primárjajte nyu marlyivo y
chver-*

chvérzto na to, da detcza vasha, kadasze
vjútro ztaněju; Boga mole, nepúztete nyu
jězt, niti zpát, doklam predi kratke molitvi-
cze nežvershé. Kaj pako při tom oszebnějno
paziti mórate; je, da detczu vashu privúcha-
te réchi molitve pólahko; y rázlošno zgo-
várjati y da nyu nagovárjajuchi prigányate,
dasze pod molitvum tiho, chedno y póskeno
dersé. Amen.

RAZLAGANYE TREJTO.

S. 2.

Od molitve Gozponove vu oszebnom.

Poklam vu pervěšem razláganya od mo-
litve vu obchinzkom govórilšezem, tak yez-
da preztuplyújěm na molitvu Gozponovu vu
oszebnom. Molitva ova je krátek závjetek
všezh oně, koja od Boga prošziti móramo.
Od ove anda prestimáne molitve budem ne
kuliko razláganyih dersal, koja za vasz, drá-
gi moji Farniki vnože lěpe y hafznovite ná-
vuke zadersávala budu.

Gdo

Gdo nash je vuchil mòliti?

Kristush Gozpon nash vuchil nash je mòliti.

Mi zaizto nebi bili znali, kak mòliti, y kak vu molitvi nashoj k-Bogu govòriti bi mòrali, dabi nash Jesush Kristush, nash Gozpon y Navuchitel nebil navchil. On vu tom neznanozti nashoj je pomogel, y szám náredbu molitve nam oztavil, koju obdersávati bi mòrali.

Po chem nash je vuchil Kristush moliti?

Kristush nash je vuchil moliti po Otcz nashu, koja takáj zovešze molitva Gozponova.

Kristush odishel je jednòch vu jedno szamòchno mezto vžemshi nekoje zmed Vuchenikov szvojev, da onde szvoju molitvu zvershi, kaj takáj vechkrát bil je návaden shiniti. Kadabi bil mòliti prèztal, rekel je jeden zmed Vuchenikov k-nyemu. Gozpone vùchi nash takáj mòliti. Jesush vchinil je, y zgovoril od rèchi do rèchi Otcz nash. Lucæ. 11. Item Matth. 6. v. 9. et seq. Zato takáj zovešze molitva Gozponova, kajti nyu nash Gozpon y Zvelichitel je narèdil, y nash navchil.

Kah-

Kakſze izgovárja Otecſ nash?

Otecſ nash izgovárjaſze ovak.

Otecſ nash, kiſzi na neběſzeh. Světíſze imě tvoje. Dòjdi Kralyčtvo tvoje. Budi vòlya tvoja, kak na Nebu, tak y na zemlyi. Kruha nashega vſzagděshnyega dáj nam deněſz. Y odpúſti nam dŭge nashe, kak y mi odpúſtichamo duſnikom nashem. Y nevpělyaj naſz vŭ zkushuvanye. Neg oſtlobòdi naſz od zla. Amen.

Kaj vu ſzebi zadersàva molitva Gozponova?

Molitva Gozponova zadersàva vu ſzebi jednoga predgovora, y ſzedem proshnyih.

a. Od predgovora.

Kakſze zgovárja predgovor?

Predgovor zgovárjaſze ovak: Otecſ nash, kiſzi na neběſzih.

Koga zazàvamo z-ovemi rechmi vu predgovoru?

Z-ovemi rechmi vu predgovoru zazàvamo Boga, koi je Otecſ nash.

Za-

Zakaj imenujemo mi Boga Otcza ?

Mi imenujemo Boga Otcza, kajti vsze nasz na szvoju zpodoba je ztvoril, y na nasz otchinzku zkerb noszi,

Pravo y vrédno mi imenujemo Boga Otcza, kajti iztinzko je. On je nash Otec, kajti mi od nyega sivilenye, telo, Dúshu, imetek, y vsze, kaj mi jeszmo, y kaj mi imamo, jeszmo prijeli. On je nashe Otcze, y Otcze nasheh Otczev ztvoril. On je nash Otec, kajti za nasz, kakti Otec za szvoju detczu zkerbi. On vizaki dan zkerbi za potreboche Dúshe y tela. On zkerbi za nasz tak, da prez nyegvoga znanya niti jeden lasz iz nashe glave neopadne. On nasz iz sizerdcza y bolye lyubi, nego haj bólshi Otec szvoje naj bólshete lyubi.

Ova draga y povolyna réch Otec, z-ko-jum mi molitvu pochimlyemo, móra vu nami pravédno lyubav vu Boga, y zaúfanost vu nyegovu otchinzku dobrótu génuti. Ovo vugodno ime Otcza, koje nam nepreszénne miloszerdnosti Bosje nazvescha, vchiniti móra, da mi vezelo y zaúfano Boga molimo, kak dete szvojega Otcza moli y prozi. Zaizto kaj je vech potrebno, daize vu nami

Razt. Kate. Ztr. II.

D úfa-

ufanye izbudi, daſze Bòg na proshnyu nashu gene, kak miſzliti, da je on Otecſh nash?

Zakaj imenùjemo mi Boga Otcza nashega?

Mi imenùjemo Boga Otcza nashega, kajti vſze naſz po Duhu ſvètom na ſvètom Kerztu za Szine ſzvoje, Odvetnike, y Zkupodvetnike Jeſtasha Kriſtusha je odrèdil, y naſz med nàmi brate vuchinil.

Mi imenùjemo Boga Otcza nashega, kada takaj Otecſh nash nè zkupa, nego ſzàmi mòlimo. Po tom opominamoſze, da Bòg je Otecſh vſzeh lyùdih, y vſzi lyùdi med ſzobum brati jeſzu. Mi jeſzmo vſzi za jedno brati y detcza Otcza, koi je na Nebu, mi anda dùſni jeſzmo za vſze lyùdi kakti za brate nashe mòliti. Mi jeſzmo vſzi zkupa bratja, andafzmo vſzi jednàki, naj budemo drugach kaj hochemo. Anda mi nèmamo zroka na druge ſziromàſke y priprozte lyùdi mèrzeti, y nye za nemar derſati, arſzu brati nashi. Jeli budemo mi proti nyim vu nevolji nyihovoj nechutlyivi, ako nye kakti nashe brate budemo premishlàvali, koji z-nam i po ker- vi jednoga Odkupitela odkùplyeni jeſzu?

Za-

Zakaj mi velimo: kifzi na nebészih?

*Mi velimo: kifzi na nebészih, kajti Bóg, ako-
prém vszegder nazochi je, oszebùjnem vendat
nàchinom vu Nebu ztanùje, gde szvojem ode-
brànem od licza do licza izkasùjesze, y za
vsivanye podaje.*

Bóg nè szamo vu Nebu, nègo takàj vu
vszeh mèztah nazochi, metemtoga Nebo je
mezto, gde Bóg oszebùjno prebiva. Mi ve-
limo, Bóg prebiva oszebùjno vu Nebu, kajti
òn vu Nebu Trònush diké szvoje je vtverdif,
szvoje zvershèno Velichànzstvo razszvetchù-
je, y vu szredini Angelov y Odebràneh ob-
lazi y mògùchnozt zvershàva. Rèchi ove,
kifzi na nebészih dàju nam razmèvati, da mi,
kada mòlimo, szerdcza nasha vu Nebo, gde
nash Otecz prebiva, y gde vu poszledju na-
sha domovina je, podignemo, vlaztito pako
pri molitvi terszitifze mòramo, da mi ono od
Boga zadòbiti moremo, kaj nam k-zadoblè-
nyu Neba potreèbno je. Ah! kak nedòztoj-
no je, ako mi ràvno ono vreme, kada mi
Boga, koi vu Nebu je, mòlimo, szamo na
zemelyzke nàszladnozti y veszelja miszlimo!
Y jelisze priztoji, da mi od Boga, koi vu
naj visbèshem Nebu prebiva, y od onud nam
szvoje najvekshe dàre y milosche podèlit feli

y hoche, szàma zemélyzka, y vechkràt skodliva dugovànya proszimo? Vchinemo anda prichetek raztolnàchenya pèrve proshnye molitve Gozponove.

b. Od pèrve proshnye molitve Gozponove.

Kakfze zgovàrja pèrva proshnya?

Pèrva proshnya zgovàrjasze ovak: szvétisze ime tvoje.

Zakaj mi pervich proszimo, dasze ime Bòsje szveti?

Mi proszimo pervich, dasze ime Bò je szveti, kajti mi vszigdàr, y pred vszemi dugovànyi mòramo prosziti zu ono, kaj na hvàlu y diku Bòsju zpàda, za tèm pak za ono, kaj nam, ali blisnyemu nashemu hasznovito y potrebno je.

Kaj je nàravi y praviczi priztojnèshe, kak da mi pred vszemi drugemi dugovànyi za ono proszimo, kaj na hvàlu Bòsju, y szvetchènye nyegvoga naj zmošnèshega imena, to jezt, nyegvoga vekivèchnoga bitja, y neprefzèsneh zvershenòztih zpàda? Bòg je vsza zarad dike szvoe ztvòril, y pèrvi bitni czily y konec, zakaj mi na szvétu kakti razumno ztvorènye jészmo, ztoji vu tom, da
mi

mi hvàlu y diku Ztvoritela nashega pčvek-
shàvati mòramo. Zàto takàj nash Navuchi-
tel Jefush Kristush vu molitvi *Otec*z nasha o-
ve rèchi: *szvetiszte ime tvoje*, naj pervich je
poztavil, da nafz po tom navuchi, da mi za
szvetchènye naj prestimanèshèga Bòsànzko-
ga imena profziti mòramo, predi nego za kaj
drugo profzimo, kaj ali nam, ali blisnyemu
hasznovito bi bilo.

Kaj profzimo mi vu pèrvoj proshni *Otec*z
nasha?

*Vu pèrvoj proshnyi Otec*z nasha profzimo mi,

1. *Da Boga vszi lyùdi na zemlyi zpoznaju*,
y da nyegvo naj szvetèshe ime vszaki valuje,
y po vszùd dichì. 2. *Dasze grèshniki k-Bogu*
obèrneju, y na pokòru gèneju. 3. *Dasze nye-*
gvo naj szvetèshe ime nigdar neozkrùni po kri-
vovèrztvu, bolvànztvu, blaznozti, y drugòm
grèshnom sylvènyu.

Kada mi molimo, *szvetiszte ime tvoje*, tak
profzimo y selimo mi, dasze Bòg, koi szam
vu szebi nepreszèsne hvàle y dike je vrèden,
od vszeh lyùdih dòztojno z-najchiztèshum,
y naj szvetèshum szlusbum postuje y szveti.
Nahàdyasze josche neizbrojèna vnosina lyù-
dih, koji Boga neznàvaju, koji nikakve

Vere, y nítakvoga Bogochàztja nèmaju, koje mĩ nevèrnike y poganine zovemo. Nahàdyajufze takàj vnògi lyùdi, koji iztina Boga spoznàvaju, nyega vendar nepostùju vu onoj Veri, vu kojoj on postùvatísze hoche, koja jedino je Katolichànzka; ovakvi jeszu vszi oni, koji nashe Vere jeszu szuprotivniki. Zadnich josche nahàdyajufze lyùdi, koji imaju pràvu Veru, ali poleg nàredbe y zapovedi nyeine nesiveju, nego hùdòbno y grèshno, y po tom Boga za nemar deršè y poteptàvaju; ovakvi jeszu grèshniki. Kada mi anda vu pèrvoj proshnyi *Otec̃z nasha* velimo, *szvetisze ime tvoje*, tak proszimo Boga, da tulike neszrèchne lyùdi, koji vu tmiczi nevere bludiju, na szvétlozt pràve Vere dopèlyati doztoja. Mi proszimo nyega, da vchiniti doztoja, da vszi, koji nashe Vere neszu, jedino zvelichenochinechu Veru Czirkve Katolichànzke primeju. Mi proszimo nyega, da vsze grèshnike na pokòru gene, y vchini, da vszi szvèto y pobošno siveju.


Ali ovo jeszu, dràgi moji Farniki ! szàmo selènya, koja zaizto vszigdàr jeszu dobra, nemòramo vendar mĩ szàmo pri oveh obztàti, nego, ako ochivèzto szuprotgovòriti nechemo, mòramo mĩ, kada mòlimo, *szvetisze ime tvoje*, takàj vu chineh zvershavati. Mi mòramo,

ramo, kuliko vu nashoj mogućnoztì ztoji, vu ztálìshu nashem Boga hvàliti y dichiti; mi mòramo vŕze proti Bogu blàznoztì, krive prìŕzege, y vŕze druge grèhe kak naj vech odurjàvati; y Boga po chiztòchi nashega ſzerdcza, po gorùchoj nashoj molitvi, po ſzvètoztì nasheh chinov, po dobroj pèlci nàshega dersànya, po vernoztì vu nashoj ſzlùsbi, po marlyivom zpunyàvanyu dùŕnoztìh nashega ztálìsha hvàliti, dichiti, y chàztiti; mi mòramo nyemu vŕzaki dàn dobra dèla ſìvlènya nashega aldùvati; miſze mòramo tak zadersàvati, da vŕzaki bude imal dobru pèldu iz nashega dersànya, y geneſze, da jednàkem nàchinom po dobròm y pobòſnom ſìvlènyu Boga chàztil bude. Na to ochivèzto naſz opomina Zvelichitel nash govorèchi: *najſze ſzvèti ſzvètlozt vasha pred lyudmi, da vide dèla vasha dobra, y diche Otcza vashèga, koi je na nebeszih. Matth. 5. 16.* Ali ò sàlozt! pri vnògeh jeſzu ſzamo pràzne rechi, y gde koj ove lèpe rèchi, *ſzvètìſze ime tvoje* k-Bogu govori, da vendar vu chinu nikaj menye nechini, kak da ime nyegovo ſzveti. Raztolnàohmo malo bolye ov k-dersànyu zpadajùchi nàvuk, da z-nyim ovo razlàganye dokònchamo.

Navùchanye,

Vi vřzaki dãn k-Bogu govórite: *řzvetiřte ime svoje*; ovo je pleg nakanenya Jefusha Kristusha najřzveteshe, Bogu naj drãgshe; y za vãřz naj hafznoviteshelenyel, koje vi chiniti morete. Ali ako mi pleg nãgnenya řzerdcza vashelga, y pleg dersãnya vashelga řzũditi hochemo, tak ova vu řzebi tak řzvetã řelya, y ova Bogu tak drãga y povolynã prořhnya pri vãřz nẽ drũgo, kak prãzne rechi, y ochivẽzto řzuprotgovorẽnyel. Kakvem nãchinom? Pãzete, y hochete po tom kaj rechi hochu, zvershẽno rãzmeti y zpõznati. Vi prořzite Boga, dãřze nyegovo ime řzveti, zpõznãva, blagosřzlãvlyã, y od cẽloga řzvetã postũje, vi pako blãznite, y ozkrũnyũjete vřzaki dãn ovo vřřze chãzti y dike naj vředneshel ime, vi zpõznãjete, da ov najvekřhi Gõzpon, y Ztvõritel vřřzeh ztvãrih postẽnya y nãklona vřřzega řzvetã je vředen, vi pako nyega ozkrũnyũjete po razpũztchenom y grẽřhnom vashem řivlẽnyu; vřřze z-nyega zespõtãvate vu lãteř řzveteh dugovãnyah, vu Cřřrkvah y pri Oltãru po vashoj zloj pẽldi y nechẽdnoztĩ, vi řelite, dãřze dika Bõřja po vřřzeh řzvetã ztrãnkah razřhiri, ter vendar nezkerbiteřze tuliko, da-

dabíſze ſzlúſba y dika nyegova vu malom
kotáru híſe vaſhe, pri vaſhoj detczy y druſi-
ni povékſhala, dapáche niti vi ſzámi Boga
nedichite, y nyemu neſzlúſíte. Jeli to ne-
znamènuje vu chinu ſzuprot ztáti onomu,
kaj vi z-vúztmi y réchmi govórite? Ah
odhítete vi, drághi moji Farniki! ovu tak o-
dúrnú ſzuprotivnozt, y Boga naj vékſhega,
y naj miloztivnéſhega, kojega tuliko púti z-
rechmi, *ſzvetíſze ime tvoje*, zazávate, zpobo-
ſhnoztjum, y dobrum pèldum ſivlènya vaſhe-
ga, z-poſtlenem y zverſh'yivem Kerſchán-
zyom poſtúíte, da vredni poztánete, nyega
jednòch vu Nebu na véke hvátiti, dichiti,
y nyemuſze klányati. Amen,



RAZLAGANYE CHETER- TO.

c. Od drúge y trèjte proshnye molitve
Gozponove.

Perva y druga proshnya molitve Gozpo-
nove bude ztrán danáshnyega razláganya.
Jedna kak y druga zadersáva vu ſzebí veli-

D 5

koga

koga y krúto hafznovitega návuka. Ovo vi zvershèno zpòznati hochete, ako na ona, koja vam napervo poztáviti nakánishem, marlytvo pazili budete.

1. *Od druge proshnye molitve Gozponove.*

Kakšze zgovàrja druga proshnya?

Druga proshnya molitve Gozponove zgovàrjajze ovak: dõjdi Kralyeztvo tvoje.

Kaj proszimo vu drugoj proshnyi?

Vu drugoj proshnyi proszimo mi, 1. Da Bõg szvoju Czirkvu, y Kralyeztvo milosche szvoje razshiri y vtverdi? Kralyeztvo pako Vràga, y grèha raztèpe y zkòncha. 2. Da nam Veru, Ufanye, y Lyubav podà, y ove krèpõzti vu nami pèvèksha. 3. Da nam po ovom sivrènyu Nebo, dopuzeti.

Da vi, dràgi moji Farniki! rechi ove, dõjdi Kralyeztvo tvoje, prav budete mogli rázmeti, tak na szledèche pázete. Kralyeztvo Bosje je trojverztno, zmed kojeh vszako lyùdem je krúto hafznovito, y seleti vrèdno. 1. Kralyeztvo Katolichánzke, y jedino zvelichenochinèche Czirkve, koju szám Je-fush Kristush je podigel, koje on gláva je,

y

y koju en nepreztáncze z-milofchum y pomochjum szvojum rávna. 2. Kralyeztvo milofchih, koje vu Dushah Pravichneh nahádyafze, vu kojeh Bóg po Veri, Ufanyu, y Lyúbavi kralyúje. 3. Kralyeztvo Neba, gde Bóg zverhu vfzeh Korushev Angelzkeh, y zverhu vfzeh izebráneh, koje vu szvoj náručaj z kup je zpravil, kralyúje, da nyihova najveksha y vekivechna oheztitozt bude. Ova tri Kralyeztva jeszu ztrán nashe proshnye y felye, kada k-Bogu govorimo, *dójdí Kralyeztvo tvoje*. Mi proszimo Boga z-ovemi rechmi, da nafz vu jedino blasenchinèchoj Katolichánzkoj Czirkvi, vu kojoj mi po milofchi y milofszerdnoztí nyegvoj na szrechu nashu nahádyamosze, do kóncza sívlénja nashega obchúvati dòztoja, da Czirkvu ovu vfze bolje y bolje na szvétu razshiri, y vchini, da vfzi, koji zvan Czirkve práve jeszu, k-nyoj dójdu. Mi proszimo Boga, da on vu nami Kralyeztvo grèha raztépe, kervolochno kralyuványe Vrága vu nami zkóncha, vfza hmánja y nepobošna pofelénja, koja nafz chinè szúfne, vu nami zatère, y szvojum szvetocheinèchum milofchum vu nami prebiva. Mi proszimo, da vu szerdczah nasheh Kralyeztvo lyúbavi podigne, koje vchini, da mi vu vfzeh du-

go-

goványah poleg dopádnosti Bòsje nàsz rávna-
ti, nyegve zapovedi marlyivo y zvershèno
obdersávati, y vu vszem nashem dersányu
nijednu drugu náredbu nego nyegovu Bosán-
zku zapoved nàszlèduvati budemo mogli.
Mi, proszimo Boga, da nàsz po dokonchánom
sivlènyu na ovom szvétu vu ono nebèzko
Kralyeztvo prime, gde on za nàsz Tronush
dike, y korunu nevímertèlnozti je pripravil,
y gde on szám vekivèchna y najveksa
cheztitost szvojev Odebráneh bude.

Paklam anda vam právo razmenye rèchih,
oveh, *dòjdi Kralyeztvo tvoje*, raztolnáchil
jeszem, tak hochu josche nekaj, kaj zevszè-
ma zmòsno, y vam pámetiti potrebno je,
napervo poztáviti. Vi vszaki dán k-Bogu
govorite, *dòjdi Kralyeztvo tvoje*, da on z
miloschum szvojum vu ovom sivlènyu vu va-
mi kralyùje. Metemtoga vj vszaki dán ovo
Kralyeztvo milosche vu vami po grèhu ra-
zèplyete. Vi zpoznávate y valùjete, ka-
da velite, *dòjdi Kralyeztvo tvoje*, da Bòg
szán je najveksih Gozpon, koj je vrèden,
da zverhu vszeh Dùshe vashe krèpoztih,
zverhu vszeh tak nuternyeh, kak vánzkih
chútenyih, y zverhu vasz czèleh kralyùje,
vi valùjete, da vu vami nikaj nè, kaj nye-
gvo nèbi bilo, y nyemu po praviczì, y dù-
sho-

snozi nebi mòralo podlòsno biti. Metem-
toga vi sivete nepreztáncze pod obláztjum
y ládavchinum pohablyénoga szvéta, pod
onemi vashemi nichemurnemi návadami, va-
shemi malovrédnemi pohlepnóztmi. Ovoszu
Gozpoda, koja zverhu vasz ládaju, y kojeh
gozpoduványe, kagoder merzko, y krivi-
chno je, vi tak lyúbite, da vi, mezto toga
dabi szerdcze Bògu za prebivalishe priprá-
vili, nyega van tirate, y nyegove preodúr-
ne nepriatele mezto nyega vu nyem naztanú-
jete. Kak né ovo ztráshno szuprotztavlé-
nye? Ah! dabi vi vre jenkrát pocheli, o-
chi vashe odprèti, y zpóznati, pod kakvem
smehkém jármom, kervolòchnem szusánztvom
vi zdihávate, kadašze od gréha, szvojlyu-
bnozi, poselény, od chutlyiveh pohlépno-
ztih ládati pùztchate.

Kajšze vekivèchuoga Kralyeztva nebèzko-
ga dotiche, za koje mi oszebùjno prošzimo,
kada molimo, *dòjdi Kralyeztvo tvoje*, páziti
je, da mishlénja szerdcza nashega, y der-
sánye izto sivilénja z-rechmi nashemi szlágati
mòraju. Kada mi Boga molimo, *dòjdi Kra-
lyeztvo tvoje*, valùjemo po tom, da mi Nebo
za nashu domovinu deršimo, y da mi ovo
szvéto y cheztito Kralyeztvo jedino y szá-
mo preštímávamo, da je vrédno nashe selye.

Kak

Kak nè anda szuprotivno , kada mi Boga proszèchi , da ovo nam Kralyeztvo dopuzti , za jedno zkupa ochi nashe kakti puzècha sivina vu zemlyu vupiramo , kadafze mi szamo z-ovem vremenitem sivrènyem zabàvlyamo , y kada nashe námere y poselènya jedino za vremenitem y chutlyiven sivrènyem hlepè ? Nadalye potreèbno je na pogled ovojga nebèzkoga Kralyeztva ono v-pámet vzèti , kaj Krístush veli : *Ne vszaki , kaj meni veli : Gozpone Gozpone , dójde vu nebèzko Kralyeztvo ; nego on , koi chini vòlyu Otca mojega , koi je na nebèzakh.* Matth. 7. v. 21. Nemòramo anda mi szamo pri tom obztáti , da k-Bogu krichimo : *dòjdi Kralyeztvo tvoje* , nego mòramo mi zkerblyivo od vszakoga grèha hábatifze , oszebùjno pako od velikoga y szmèrtnoga grèha , koi nam Nebo zapira. Mi morámoszi trùda vzèti , da vu Nebo dójti moremo , mòramosze terfsziti , nashe dusnoztì zvershávati , chìne lyùbavi chiniti , y szvèto sivetì ,

2.Od trèjte proshnye molitve Gozponove.

Kaksze zpovárja trèjta proshnya ?

Trèjta proshnya molitve Gozponove zgovàrjasze ovak : budi vòlya tvoja , kak na Nebu , tak y na zemlyi.

Kaj

Kaj proszimo vu trëjtóej proshnyi?

Mi proszimo vu trëjtóej proshnyi, 1. Da nam Bòg szvoju miloschu podeli, vòlyu nyegovu Bosánzku vu vszeh pripechénnyah na zem'yi tak veino y radovòlyno zpunyàvati, kak nyu Angeli y Blàseni vu Nebu zpunyàvaju. 2. Da Bòg vsze odvèrnuti dòztoja, kaj zver-shàvanye vòlye nyegove Bosánzke bi moglo preprèchiti.

Kada mi ove rèchi zgovárjamo, budi vòlya tvoja : tak proszimo Boga za vsze lyùdi vu obchinzkom, y za vszakoga zmed nasz poszebnò za miloschu, do mi vsze ono hochemo, kaj Bòg hoche, y níkaj nechemo, kaj Bòg nèche. Jeli rázlosnoj pámeti, y praviczi more biti kaj priztojnèshe? Jeli kaj za nasz bolshe y hasznovitèshe, kak zpùniti náklona najvrednèshu vòlyu Bosánzku? Bòg je bitje vszeh bitjih, Ztvoritel vszeh ztvárih, po vòlyi nyegvoj vsza jész, y vsza chinitisze mòraju, nyoj vu kakvomgoder pripechénnyu szuprotivno chiniti, je zevszèma nezpamètna y prevzètna poufanozt szuprot Velichánztvu y praviczi Bosánzkoj.

Ali odkud mi známo, kaj Bòg hoche? On podáje nam vszakojáchke náchine vòlyu nyegovu Bosánzku zpoznati. Po szvojev

zapovedih, po náredbah y odluchénayah
 szvoje szvète Czirkve, po zapovedih nasheh
 pravdeneh ládavczev, Pogiavárov, Prepo-
 ztávlyeneh, y Roditelov, po prodekuvá-
 nyah, navúchanyah, y opominanyah nasheh
 duhovneh Paztirov, po důsnoztjah nashega
 ztálisha, po szuprotivchinah y nevolyah, po
 nuternyeh nadehnénayah, Kada mi anda mo-
 limo, *budi vòlya tvoja*, tak prošimó Boga
 za miloschu, da nyegove zapovedi obder-
 sávati, naz Czirkvenem náredbam podlósiti,
 naz poleg vòlye nasheh Prepoztaávlyeneh y
 Roditelov rávnati, opominanya nasheh du-
 hovneh Paztirov pošzlúshati, důsnoztí na-
 shega ztálisha zpùniti, nuternya nadehnénya
 nazsleduvati, y vsze szuprotivchine drago-
 vòlyno podnáshati budemo mogli. Ali, kak
 mi moremo, iztinzko govorech, ovu moli-
 tvu zvershávati, kada nyoj czèlo nashe si-
 vlénýe szuprotivno je? Kada mi zapovedi
 Bòsje bahatno prekershùjemo, zapovedi
 Czirkve neprestimávamo, nasheh Prepo-
 ztaávlyenem szuprotztavlyamofze, y z-nyi-
 hoveh náredbih zespotavamofze? Kada mi
 důsnoztí ztálisha nashega zamudyávamo?
 Kada mi vu naj menyshoj neszrechi, kojafze
 nam pripeti, vu naj menyshem pripechenyu,
 koje nam je szuprotivno, zbludimofze, y
 szu-

szuprot Bogu mermrajuch, ali bláznech podifemosze? Ponizemosze anda pred Bogom zarad nepokórnoztí nashe, vu kojoj do szada siveliszmo, y zkrúshenem szerdczem odlúchemo, tverdokórnozt nashu po zvershènoj podlòsnoztí vòlyi nyegvoj Bosánzkoj nadomèztiti.

Kristush rechem onem, *budi vòlya tvoja*, pridaje, *kak na Nebu tak y na zemlyi*, potom hotel je naz navúchiti, da mi Bogu na zemlyi tak pokórnozt izkázati mòramo, kak nyu bláseni Angeli vu Nebu zkasúju. Angeli chine vòlyu Bosánzku marlyivo, radovòlyno y szvèto. Ovo je zmošna pèlda, koju mi nam pred ochi poztáviti, y nazsledovati mòramo, to jezt, mi mòramo podlòsnozt Angelov imati, da vsza poleg vòlye Bòsje, y zapovedih nyegoveh chinimo; nyihovu vèrnozt, da nikaj neoztávimo, kaj nam zapovédano je, nyihovo chfzto nakanenye, da Boga vu vszeh dugoványah jedino ischemo, y vsza na hválu y diku nyegovu rávnamo; nyihovu marlyivozt y ztálnozt, dasze vu szlusbi Bòsjoj nigdar nevtrúdimo; nyihovu gorúchu selyu, da vsza z-hitrum, ztálnum, y selnohlèpnum lyúbavjum zvershávamo. Na Angele nebèzke mi gledati mòramo, da vsza zvershèno poleg vòlye Bòsje chinimo; z-

Razt. Kate. Ztr. II.

R

vše-

všèma pako nemòramo mi gledati na vnosinu grèshnikov, koji ovde na zemlyi Bogu nepokòrni jeszu, dasze mi po nyihovoj hmán peldi nezpáchimo, dabi Bogu nepokòrni bili. Ako mi vidimo, da drugi lyùdi zlo sivu, nemòramosze záto zblùditi. Mi mòramo miszliti, da, akoprèm szvét pun bi bil Bogu nepokòrneh lyùdih, vszigdár vendar iztinito oztáne, kaj Kristush veli: *ako hoches vu szvlènye vekivèchno vlezti, obdersàvaj zapovedi.* Matth. 19. v. 17. Akoprèm josche tuliki lyùdi bi bili, koji bisze zapovedi y vòlyi Bosànzkoj szuprot ztávlyali, vnosina vendar nyihova nebude vu ztálishu, da vuchinyene od Boga náredbe prevèrne, koje vu tom ztoje, da on, koi hoche vu Nebo dòjti, vòlyu Bòsju zpunyávati mòra. *Koi chini vòlyu Otcza mojega, koj je vu Nebu, on bude zvèlichen.* Matth. 7. v. 21.

Navùchanye.

Zaizto, moji drági Farniki! ja josche jenkrat velim: da drugoga pùta ne, koj nasz vu Nebo pelya, nego zpunyávanye vòlye Bòsje, ar szvétozt, po kojoj Nebo zadobivasze, ztoji jedino vu tom, da mi chinimo, kaj Bòg hoche. Vša anda, kojagod chinimo,

mo, teršzemošze poleg vòlye Bosánzke
zvershávatí. Chuvajmošze, da mi poleg lá-
ztovite vòlye nashe nesívemo. Vòlyá nasha
je šalépa, koja rávno tak od szlepeh vodiyih,
kak je y száma, najmre od chutenyih, y
pohotnozrih vodiszze y rávna; Vòlyá nasha
je túpa, y odurjáva podlóšnozt; je szvoj-
vòlyna, y poleg nagnenya szvojéga, koje
nyu rávna, jezero premenybam podvérsena,
kaj danasz feli, to zutra odurjáva; Vòlyá
nasha je hudobna y na zlo nagnyena, ar po
gréhu je pokvárjena. Ah! Moremoliszze mi
od tak zprávylyene vòlye kaj drugo nádeati,
nego da naz vu vekivečno škvárenye po-
rine? Vòlyá pako Bosánzka je vszigdár do-
bra, vszigdar pravichna y szvéta, koja nashu
vekivechnu cheztitozt y blášenozt feli y
hoche. Amen.



RAZLAGANYE PETO.

d. Od cheterte y pete proshnye molitve Gozponove.

Ja nakanilſzem danafz vam, moji dràgi Farniki! chetertu y petu proshnyu molitve Gozponove raztolnáchiti. Raztolnáchenye zaizto ovo, koje zverhu oveh proshnyih vam chinil budem, je ofzebùjno y puno návuka na dersánye Kerſchánzko zpadajùchega. Da pako vſzu onu hafzen iz nyega imati budete mogli, koju doprinezti more, tak proſzim vaſz, da mene z-pazlyivem ſzerdczem poſzlùhnete. . Ja pochetek chinim od cheterte proshnye.

1. *Od cheterte proshnye molitve Gozponove.*

Kakſze zgovàrja chetérta proshnya?

Chetérta proshnya molitve Gozponove zgovàrjaſze ovak: kruha naſhega vſzagdèshnyega dai nam danafz.

Kaj

Kaj profzimo vu chetèrtoj proshnyi?

Vu chetèrtoj proshnyi profzimo. 1. Da nam Bòg podeli vsze, kaj nam na zdersávanye telovného y duhovného fivlènya je potrežno. 2. Da Bòg drafinu y gláda, kak takaj grèhe, koji ovakve kástige návadno za szobum vlècheju, od nasz miloztivno odvèrnuti döztoja.

Koja dobromu šivlènyu döztoja.

Kak dálko pretèšesze miloztivna zkerblyivozt Boga Gozpona y Otcza nashega! Kak-ti Gozpon zdersáva nasz, koji szluficze nyegvi jefzmo, y kakti Otecz dáje nam kakti detczy szvojoj hránu. Chudo nyegvoga Bosánzkoga providyènya, y nyegove neprešzésne miloszerdnozti pretèšesze jofche dalye, kajti on nè szamo detczu szvoju, koja nyega lyùbe, y szlùge szvoje, kojifze nyega boje, nego takáj izte szvoje, nepriatele, koji nyega tajè y bantùju, hráni. Onsze zkerbi za zdersávanye vszeh oneh, koje je ztvoril. Dapáche zkerbisze za naj gorshu šivinu, od kojefze nezpoznáva, y za najmenyshe zemèlyzke cherveke, ar on vfzem, alifze vu zráku, ali vu glublini mòrzkoj, ali gdegód na szvétu zadersávaju, nyihovu hránu pre-zkerblyùje. K-ovomu anda miloztivnomu y dobromu Bogu, koi je zvirališche vszega do-
bra,

bra, obráhamofze mi y vtèehemo, kada velimo; *kruha nashega vszagdeshnyega daj nam danasz.*

Mi proszimo nyega z-ovemi rechmi, da nash vu potrebóchi nashega duhovnóga y telovnóga sivrénýa prezkerbi. Mi lyúdi imamo dve razlúchene ztráni: najmre tēlo, koje je iz mēsza y kervi, y jednu Dúshu, koja je Dúh nevmertēlni. Kakti anda tēlo náravzku hránu potrebuje, da sivetí more, tak takáj Dúsha potrebuje duhovnu y zverhunaturálzku hránu, dasze pri duhovnom sivrénýu obdéršati more. Duhovno sivrénýe Dúshe je. 1, Miloscha Bòsja, lyùbav Bòsja, po kojoj Dúh sžvėti vu nami prebiva, y nash chini sive, prez ove lyùbavi je chloyek duhovnem náchinom mertev, kajti vu takvom ztálishu nikaj pájemnoga za vekivèchno sivrénýe vchiniti nemore; odkud pishe Sz. Janush: *koi nēma lyùbavi, je mertev.* 1. Joan. 3. v. 14. Na duhovnu hránu Dúshe zpáda josche. 2, Zverhunaturálzki kruh, koi je tēlo y kerv Jesusha Krístusha vu presžvėtom Oltárzkom Shakramėntu, po kojem Dúsha vu zverhunaturálzkom sivrénýu milosche obja- chùjesze, y na vekivèchno sivrénýe hráni- sze. *Koi onoga kruha jē, veli Krístush, bude na vėke sivek.* Jean. 6. v. 59. Koi pako neje, on

on nebude imal fivlènye; ztanovite, ztanovite
velim vam, ako nebudete jeli mész Szina chlo-
vechjega, y nebudete pili kervi nyegove, nebu-
dete imali vu vami fivlènya. Ibid. v. 54.
Rèch Bòsja, 3. je hrána y zdersávanye Dù-
she, kajti prikladna je, vu nami zbùditi lyù-
bav na zvershávanye dùšnoztih nasheh, za
izvrachiti nashu szlabòchu, y popráviti nashe
blùdnosti y krivnye, akoszmo fivi, more
nasz zdersávati, ali akosze vu ztálishu szmer-
ti nahádyamo, nasz znovieh prebùditi. 4.
Zadnich vsze ono je hrána Dùshe nashe, kaj
je mogùchno nasz vu miloschi Bòsjoj zachù-
vati, ali, ako nyu pogùbili jeszmo, nyu nam
nazád povèrnuti. Náravzka hrána tèla ztoji
vu kruhu, to jezt, vu jelu y pilu, vu opra-
vi y ztanuványu, y vu vszem, kaj nam vu
nashem ztálishu za obchúvanye fivlènya po-
trèbno je.

Kada mi anda k-Bogu gevorimo: kruha
nashega vszagdeshnyega daj nam danasz, tak
proszimo nyega, da Dùshu nashu z-szvojom
Bosánzkum rechjùm, y z-szvojem szvétèm
návukom nahrámi, da nasz vszigdár z-vuchè,
nemi, vu Dùhu razszvétchenemi y krèpo-
ztnemi duhovněmi Paztiri darúje y prezker-
bi, koji nam iztinu budu ochituvati, y nyu
vùgodno, szvéto, odperto y hafznòvito nam

napervo dávali; da mi vu nyegvoj szvêtoj rêchi vszigdár szlázť nájdemo, y da nam miloschu podeli, da mi nyu z-veszelem y navuchlyivem szerdczem poszlúhnemo. Mi proszimo nyega, da mi nyegovo preszvêto têlo y kerv z-onum pripravum primemo, koja potrebuješze, da vu nami sivrénje obchúva. Mi proszimo nyega, da nasz vu sivrénju milosche szvoje obderši, ali pogúbyleno nazád poverne, y vsze od nasz odvérne, kaj nasz na grêh, koi Dúshu vumárja, napéyati bimoglo.

Kajsze telovnága sivrénja dotiche, proszimo mi Boga po gore zpomenúteh rechêh, da nam jelo y pilo; prebivalishe y opravu, y vsze drugo prezkerbi, kaj mi za nashe príztojno zdersávanye potrebujemo; da od nasz vize odvèrnuti doztoja, kaj glád y drašinu za hránu potrebnêh za szobum vlêchi bi moglo, kakti jeszu: Pogor, Vojzka, Tucha, Povodnya y ovém zpodobna. Proszimo takáj Boga, da odvérne grêhe, koji vechkrát zrok jeszu, da Bóg szvéta z-drašinum, gladom y drugemi nevoljami pohádyá. Ovo je, drági moji Farniki! naj oszebujněshi y glávni zavjetek rêchih chetèrte proshnye molitve Gozponove, *kruha nashega vszagdeshnyega daj nam danasz.*

Vsza-

Všzaka rěch vu ovoj proshnyĩ je puna návuka, zato všzaku zofzeb razlõfiti y raztolnáchiti hochu. Kristush veli nam szamo kruha profziti, po tom nash navúcha, da mi nikaj drugo od Boga profziti nemóramo, nego kaj za nashe, y všzeh oneh, koji nam zaufani jeshu, y kojim mi pošteno y nyihovomu ztálisnu prizto no hránenye dũni jeshmó dati, zdersávanye potrebnó je. Mi móramo vu tom poselénýe nashe ztègnuti, niti na visherédna y nepotrěbna pretězati. Tam zpáda opominanye Sz. Pavla, koĩ pishe: *ako mi imamo hranu y opravu, budimo zadovolyni.* 1. ad Tim. 6. v. 8. visherédno je nehasznovito, dapáche po nenárednom všivanyu škodlivo, preobilnozt vufise pohlěpnozt, zbudyáva gizdozt, y zverhu drugeh oponofznozt, chutlyivozt podise. da prekořédnem poselénýam zadozta vchini. Shalomon naj mudrěshi zmed Krályev Izraělzkeh dáje nam vu ovom dugoványu vitesku peldu, koja je vrédna nashega nashleduványa. *Gozpone, viche on k-Bogu. szíromasťvo y bogátztvo nedajmi, nego dajmi hrani mojoj potrebná.* Prov. 30. v. 9.

Kristush vuchi nash, kruha nashega profziti, to znaměnuje, za takov kruh profziti, kojega mi z-nashum marlivóztjum, y z-nashem

shem trùdom y delom zafzlúfítí y pribáviti móramo. Bòg neche, da mi pri molitvi za nashe potrebne ztroske lèni, vtráglyèvi y mangujùchi budemo, nego hoche, da mi poleg toga, kada Boga za potrebna prošimo, teršimofze takáj ona nam posteno prezkerbeti. Ako mi poleg nashe mogućnoztí budemo delali, posteno zabávlyalífze, y poleg toga Boga pred ochmi imali, tak szegúrno budemo vřzaki dán tuliko imali, kuliko nam potrebno je. Ako pak chlovek na delo je lèn, zlochezto gozpodári, y obilno sive, y vřze zadržásha lebudí kak, tak nè chudo, akoga Bòg vu sziromáštvo dòjti puzti.

Pò oveh rechèh vszagdáshnyega y danasz: *kruha nashega vszagdáshnyega daj nam danasz*, opominamofze mi, da prekoređnu zkerb za vremenita y budùcha ódhitimo, y vřze nashe zkerbi vu náruchaj Otcza nebèzkoga poztávimo. Nebudimo mi vre danasz jáko zkerblyivi, kak budemo zutra síveli; Bòg, koi danasz, y vre zdávnya za nash je zkerbel, bude takáj zutra za nash zkerbel. Prekoređne zkerbi za vremenita odhititi móramo, to jezt, one, koje zařfanozt vu providyènye Bòsje odhitávájú y zamèchu. Vu tom ztoji on preštímáni návuk dersánya, kojega nam Kristush vu Evangeliumu dáje govorèchi:

nebu-

nebudite zkerblyivi za vashe stvlenye, kaj bude-
te jeli, niti teltu vashemu, kaj oblechete. Neli
Dusha vasha vech kak hrana, v telo vech kak
oprava? Poglejte pticze nebezke, da neszaju,
niti senyu, niti vu slaglye zpravlyaju, ter Otec
vash nebezki hrani nye. Nexteli vi varleshi od
vyih? Matth. 6. v. 25. 26. Y za opravu
kajzte zkerblyivi? Premiszlete polyzke liliume,
kak raztu, nedelaju, nit predeju. Velim pako
vam, da niti Shalomon vu vszoy diki szvojoj ne
bil tak opravlyen, kak jeden zmed oveh. Ako
pak Bog polyzku travu, koja danasz je, y zutra
v-pech hitisze, tak opravlya; kullko bolye vasz
male Vere? Zato nebudite zkerblyivi govorechi:
kaj budemo jeli, ali kaj budemo pili, ali z-
kemsz budemo odevali? Ar zna Otec vash ne-
bezki, da ova vsza jesz vum potrebn. Ibid.
v. 28. et seq. Vsze ovo razmévatisze mora
od nemertuchlyive y prekorédne zkerbi za
buducha. Kajsze pako mertuchlyive zkerbi
y truda za buducha dotiche, ova ne szamo
ne prepovedána, nego dapáche je potrebn,
y providyénie Bosánzko szamo od nasz ta-
kovu potrebuje, daszi potrebn za hranu pre-
zkerbimo. Bog hoche, da mi, ako hoche-
mo posteno sivet, nam y nashoj detczy z-
postényem pomóchi, dobro gozpodarimo,
zkerbimo y delamo. Ovo je nashe zványe,

y

y mi jeshmo za poszluvànye na szvétu; *chlo-
vek*, veli od Boga razszvétcheni Job, je ro-
dyen na delo, *kakti-ptierza na létanye*. Jobi. 5.
v. 7. Koi nèche delati, y dobro gozpodàri-
ti, nikaj nezteche, y nikaj nebude imal;
prez dela pri lénom y mangujúchem sivle-
nyu, y po razzipnoztì, pijanchuvanyu, y
zlocheztom gozpodàrenyu dojde chlovek na
sziromaštvo, dabi kakgod bogat bil. Duh
Sz. ovo nash vuchì: *lena ruka chini sziroma-
škoga*. Prov. 10. v. 4. Koi po gozstèh hodi,
vreme vu jelishu y pitju troshi, bude pòmemy-
kanye terpel, y koi vino lyùbi, on nebude bo-
gat. Ibid. 21. v. 17. *Pianczì y poserlivczì*
na sziromaštvo dözpeju. Ibid. 23. v. 21. Da
všze ovo je iztina, vuchi nash zadozta zpo-
znànye. Chlovek anda, ako hoche dobro
siveti, mòra vu szvoje vreme po marlyivom
delu zàto zkèrbetishze; vu tom ztoji ona rãz-
bornozt y mùdrozt, koju Duh szvétì od
nash potrebuje, kada po vùztah mùdroga
Shalomona govori: *odidi ti lenyak k-mràvczu*,
poglèj y premiszli nyegove pùte, y vùchishze mù-
drozt, *akoprèm nema vodye*, nit navuchitela,
nit gozpona, vendar pripràvlyaszì hranu v-letu,
y zpràvlya vu vremenu setve, da potlam jezti
ima. Kak dugo zpis ti lenyak, kadaszè hoches
od tvojega zpànya gore ztati? Josfke budes
neku-

nekuľiko žpal, jofche malo drèmal, y ruke na prekris me tal, daſzi pochines; onda tebi nadòjde ſziromàſtvo, kakti pùtnik, y pomenykanye kakti oboruſni chlovek. Ako pak nebudes lèn, takti dòjde ſetva, kakti ſdenecz, pomenyka od tebe odi-de. Prov. 6. v. 6. et ſeq. Metemtoga kakgoder delo, y razborita zkerblyivozt takàj je potrèbna za poſteno zdersàvanye, ovo mi vendar nemòramo ſzàmoj nashoj marlyivozti y razbornozti pripisàvati; nego blaſoſzlovu Bòſjemu: ar z-vſzem nashem trùdom y delom, y po vſzoy ràzbornozti dàlko vu napreduvànju nezàjdemo, ako Bòg neda ſzvoj blaſoſzlov k-tomu: vu Bòſjem blaſoſzlvu je vſze poztàvlyeno. Mi mòramo anda Boga vſzigdàr proſziti, da naſhe delo blaſoſzlòvi, da vu nyem y z-nyim napreduvati mogli budemo; ov pako blaſoſzlov mòramo mi terſzitiſze po pravichnom Kerſchànzkom ſivlènyu zadòbiti: ar blaſoſzlov Gozpona je na glàvi pravichnoga. Prov. 10. v. 6.

Ovde jofche je v-pàmet vzèti, da takàj bogati kruha vſzagdàshnyega proſziti mòraju, akoprèm vech imaju, nego za vſzagdàshnye zdersàvanye potrèbuju. Ar valuvati mòraju, da bogàztvo ſzvoje od Boga imaju, koi nye ali od bogateh roditelov je puztil roditelſze, ali obilno odvechtvo nyim je poſzlal, aliſze bo-

bogato osènitì dâl, ali drugach nyim nàchinè y pùte pokàzal je, dafzu bogati pòztali. Kaktigod anda Bogati zpoznàvati y valùvati mòraju, da vŕze, kaj pràvdenem nàchinom imaju, od Boga imaju, y da nebi imali, da bi nyim od dobròte Bosànzke nebilo dàno, tak takàj zpoznàvati mòraju, da Bòg nyim pak vŕze vzèti, y z-bogàteh lyùdih na jena kràt profzjàke napràviti more. Zàto imaju zroka Bòga profziti, da nye blàga nyihovoga nementùje; *oni nemòraju vu ſzvojem bogàtztvu okòlni biti, niti zàufanozt ſzvoju vu nezàtnom bogàtztvu pòztàvlyati, nego vu Bogu ſivomu, koi nam vŕza dàje obilno na vŕivanye.* 1. ad Tim. 6. v. 17. Naj premisŕle rêchi Dùha Szvétoga: *koiŕze zàufa vu ſzvoje bogàtztvo, on opàdne.* Prov. 11. v. 28. Naj premisŕle, da Bòg nyim zàto vech je dâl, nego potrebuju, da onem, kojem potrebnà menykaju, od ſzvoje preobilnozti podelè. Szada pak preztuplyùjem na raztolnàchenye pète proshnye molitve Gozponove.

2. Od pète proshnye molitve Gozponove:

Kakŕze zgovàrja pèta proshnya?

Pèta

Pèta proshnya molitve Gozponove zgovàrjasze ovak: odpùzti nam dùge nashe, kak y mi odpùztciamo dusnikom nashem.

Kaj proszimo vu pètoj proshnyi?

Mi proszimo vu petoj proshnyi, da nam Bòg nashe grehe oprozti, kak y mi iz sžerdca opràztciamo onem, koji nasz zbantùvali jeszu.

Dùgi, za kojeh mi odpùztcchanye vu ovoj proshnyi proszimo, jeszu grèhi nashi, zaradi kojeh mi Bogu olter rachun jeszmo dùfni, y zbog kojeh on poleg zapovedi pravice szvoje vrèdnu zadovolyschinu potrebuje, odkud izpelyàvasze, da mi, pokedòb vszeštàd greshimo, vu vszeh létah sivrènya nashega nè drugo kak dùge pri Bogu jeszmo napràvili, y da mi tak zrok imamo, Boga z-gorùchem sžerdcem prosziti: odpùzti nam dùge nashe.

Rèchi: kak y mi odpùztcchamo dusnikom nashem, koje pètoj proshnyi pridàneszu, vrèdne jeszu oszebùjno v-pàmet vzèti. Mi nemoremo pri Bogu odpùztcchanye grèhov nasheh zadòbiti drugach, nego ako dusnikom nashem, to jezt, onem, koji nasz zbantùvali jeszu, oproztimo. Ako ovo nevchinlmo, taksze pripeti, kaj je Krìstush nepremenlyivem, y nigdar nazàd nevzetlyivem nàchinom rekel:

rekel: *ako vi lyadèm neoproztite, tak niti Oterz vash neoprozti vam grèhe vashe. Matth. 6. v. 16.* Oprozti nam kakti onomu szlùgi vu Evangeliumu. Ov bil je Gozponu szvojemu dùsen deszet jezèr talèntumov, y kadabi dùga nemogel platiti, opal je na kolena pred Gozpona szvojega profszèchi nyega, dabi z-nyim poterplènye imal, y josche nekuliko pochakal, doklam bi plàtiti mogel; Gozpon szmiluvalsze je nyemu, y opròztilmu vész dùg. Nè za tèm dugo bilo, da ov szlùga izidùchi nashel je jednoga zmed szvo-jeh zkupszlùsbenikov, koi nyemu bil je dùsen zto deszetàkov, y dersèchi gnyàvil je nyega, govorechi: plàti kajszi dùsen. Y poklèkshi zkupszlùsbenik profzil je nyega, govorechi: imaj z-menum poterplènye, y vsza povèrnem tebi. On pako nè hotel, nego odishel je, y nyega poztavil vu vùzu, doklam bi dùg naplatil. Poklam bi bil Gozpon nemiloszerdno baràtanye szlùge ovoga zachul, dozval je nyega predsze y rekel nyemu: ti szlùga hmànyi! jazzem tebi vész dùg oproztil, kajti mene jeszi profzil. Nèlì bilo y tebi potrebnò szmiluvatisze zverhu zkupszlùsbenika tvojega, kakszemsze y ja tebi szmiluval? Dàl je nyega za tèm Gozpon szerdit haharom na muke, doklam vész dùg

düg naplati. *Ovak takajshe y Otecž mój ne-
bėzki vchini vam, ako iz sžerdca neoprožtite
vszaki bratu sžvojemu. Matth. 18. a v. 24.*
usque finem. Mi mōramo takvi biti proti
nepriatelom nashem; kak selimo, dabi Bōg
proti nam bil. Mi mōramo vsza zbantuvā-
nya y zāmere, od kogagod bi dohādyaie, y
kakvėmgod nāchinom biſze pripētile; oprō-
ztiti, mi mōramo nē sžamo z-vūztmi, ali sža-
mo zvāna zkazlyivo y liſzichno; nego iztin-
zko, y z-czeloga sžerdca oprōztiti. Iztina
je tēsko vsze pozābiti, kaj je nam zla vu-
chinyeno, ali premisłziti mōramo; da mi,
ako nashem nepriatelom y zlotvorom neo-
prožtimo, za nikaj nam ūfanye naprāvlyamo,
dabiſze Bōg y kada genul za oprōztiti nam
grēhe naše.

Navūchanye

Moji drāgi Farniki, jeli vi znāte; kaj chi-
nite, kada onū prestimānu Bosānzku molitvu
zvershāvate, ako nepriatele vashe iztinzko
nelyūbite? Vi sžāmi sžuprot sžebi govōrite,
kada velite: *odpūzti nam dūge naše, kak y mi
odpūzitchamo dūsnikom nashem*, dapāche sžu-
prot vam sžāmem ztrashen sžūd chinite, vi
iz oveh rechiñ zvelichenya chinite rechi o-

Razt. Kate. Ztr. II:

Ѣ дѹгѹ

dürnozti, y porivate vafz szàme vu ztrahovito proklétztvo, ar ako vi zaizto vu chinu nèzte pripravni vashem nepriatelom opròztiti, y vu takvom ztálishu molite: *odpùzti nam dùge nashe, kak y mi odpùztciamo dusnikom nashe*; to znamènuje tuliko, kakti k-Bogu rechi: *Gozpon y Bòg moj?* kagoder ja vu fzerdczu mojem noszim jàl y nàzlob szùprot mojemu nepriatelu, tak y ti mene takàj jednàko odurjàvaj. Kakva ztrahota! Ah! premiszlete to, kada Bòg vafz na vèke od licza szvojega odhiti, y k-vam reche: *iz vùzt tvojih szùdim tebe*. Luca 19. v. 22. Vizte mene vszigdàr profzili, da vam grèhe vashe tak oproztim, kakzte vi vashem nepriatelom opròztili; kakti pako vi nigdàr nèzte opròztili, tak niti ja vam nigdàr neszem opròztìl; vashe anda pogublènye je iz szàmeh vaf. Dùfnozt vasha je ovo saloztno dopitanye vrèdno premishlyàvati, y nyemu vu vremenu terszit sze vugnuti, drugich vu tom ponòchi nè mogùche. Ali mòrate vi nepriatelom vashem opròztiti, ali chakati, da od Boga na vèke odhitcheni budete. Premiszlete anda dobro, na koje zmed oveh dveh odlùchitisze hochete? Oproztchènye, koje vi nepriatelom vashem vuchiniti mòrate, je pogodba, z-kojum Bòg obèche vam grèhe

oprò-

opròztiti. Pokehdòb vi grèshniki jezte, ke-
jem od Boga potreèbno je oproztchène, tak
izpunène pogodbe ove je tak hafznovitò y
potreèbno, da ono zamùditi nemòrate. O-
pròztete anda, dràgi Keršcheniki! nepriate-
lom vashem, oproztete nyim iztinzko ze-
vszèma, iz czèloga, Szerdcza, z-vòlyum pro-
ti nyim nàgnyenum. Z-ovem y nè drugem
nàchinom moreteszi vu poniznoj zaùfànozti
obečati, da Bog takaj vam oprozti. Amen.



RAZLAGANYE SHEZTO.

e. Od shèzte proshnye molitve Gozponove.

Poklam szlofnost, z-kojum nashe dve ztrà-
ni, najmre Dúsha y telo, jeszu bile nakin-
chene, po grèhu je zkòchana, poztàvlyeni
jeszmo vu on ztálsh, vu kojem mi népre-
ztàncze szuprot nashem pùntarzkem poho-
tnoztjam, y szuprot onomu nepriatelu bori-
tisze mòramo, koi ztálno pazi, da iz nashe
nuternye naszlofnozti hafznu vzeme, y ovo
je zviralishe vszeh zkushàvanyih, zarad
kojeh mi vszevdily pazlyivi biti, y Boga
F 2 pro-

profziti môramo, da našz chûva y brâni. Ovo mi chinimo vu shêztoj proshnyî moſitve Gozponove, koja ovak zgovârjaſze:

Kakſze zgovârja shêzta proshnya?

Y nevpelyaj naſz vu zkushâvanye, koje bude ztrânka danâshnyega razlâganya, na koje proſzim da marlyivo pazili budete.

Kaj proſzimo vu shêztoj proshnyî?

Mi proſzimo vu shêztoj proshnyî, da nam Bôg vu vremenu zkushâvanya ſzvoju miloſchu y pomôch nezhrâti, y nepigri naſz zkushâvanyâ privôliti.

Zkushâvanye znamênuje vîzako naduſženye y nagibnye na grêh. Mi neproſzimo od Boga, da naſz od vîzakoga zkushâvanya oſzlobodi; ovo proſziti, bi bilo tuliko, kakti nehoteti terſzitiſze, niri boritiſze, na ovom zbûrkanom moſtu, gdeſze nahadyamo, vu nepremenylyivom pochinku, y zverſhenom miru ſiveti hoteti, to je pak takvo dugovanye, kaj niti ûfatiſze, niri od Boga proſziti moremo, ar râvno ovo bi chudo bilo, y nam kakti grêshnikom zevſzêma nè doztojno, od Boga chuda proſziti. Dapâche zpâda na
Bo-

Bosànzko providyènye, y za nashe najvekshe dobro je, da mi vřzi nasha zkushàvanya imamo, da mi nashu vèrnozt proti Bogu pokazati, y on priliku ina, nasz naplàtiti. *Blasen je chlovek, koj zkushàvanye terpi y podnàsha, ar poklam za dobro y vrèdno xpoznan bude, prime korunu, koju Bòg obèchal je sřzbe lyùbèchem.* Jac. 1. v. 12. Dapàche niti Szvetci nèszu bili prozti od zkushàvanyih, z-kèm biliszu szvetèshi, z-tèm bolye po zkushàvanyah nyihove krèpozti bilestu zezvèdane, oni pako z-tèm na vekshu szvètozt doshli jeszu, z-kèm veksha zkushàvanya terpeliszu, izti vtelòvlyeni Bòg, nàklona vrèdmi Szin Bòsji, Szvèt vřzeh Szvèteh, Kristush Jefush hotel je vu dnèveh szvojega vñertèlnoga sivrènya, nam na pèldu, zkushàvanya podnàshari. Matth. 4.

Ali kakgòd velika je hafzen zkushàvanyih, nam vendar bi bila skodliva, dabiřze vu nyih prez pomochi Bòsje oztavili. Mi iz nasz szàmeh drugo nèszmo nego szlaba terztina, y kerhka poszuda, koja vřzigdàr vu pogibeli je potrètisřze; pri vřzakom korachaju mi opàdnemo, vu vřzakoř priliki nasz nepriatel zavali, ako nebude pomochi vřzalogùche rùke Bosànzke, koja nasz vu vřzakom meztu bi zprevàdyala, chùvala y brànila. Za ovu

pomoch y miloschu proszemo mi Boga, kadaze k-nyemu vtechemo, da nasz nezapelya vu zkushavanye, to jezť, mi proszimo nye-ga, da nasz vu zkushavanyu neozťavi; nego nasz z-szvojum miloschum objachi, da ona preobladamo.

Od koga mi oszebujno zkushavamofze?

Mi zkushavamofze oszebujno od szveta, od nashega tela, to jezť: od nashek hmàn naszladnoztih y poseleny, y od Vraga.

Ovi tri jezťu najgorshi napriateli, koji ne-preztancze na nasz navalyuju, da nashu Dushu na zkvarenye dopelyaju. Szvèt nasz zkushava y naduszava na zlo po szvojech zleh razgovoreh, po szvojech vpelyàneh hmàn obichajeh y àavadah, po szvojech naszladlyiv-
 veh veszeljah, y po szvojech kriveh àavu-
 keh. Tèlo, po kojem mi drugo nerazmèva-
 mo, nego hmàn poselènya, koja na zlo ima-
 mo, y ova jezťu poszedje grèha izhodnoza,
 zkushava nasz, ar chini, da nashe nàgnenye
 na zlo vszigdàr jakshe je, nego na dobro.
 Vràg zkushava nasz po chalàrneh y hnà-
 nyeh nadehnènyah, ov glavni nepriatel lyu-
 dih shetuje na to, kakbi nasz od dobra od-
 vèrnuti, na vszakojàchke grèhe y hudobe
 na-

napèlyati; y na zkvàrenye dopèlyati mogel. *Szuprotivnik vash Pràg obhàdya kakti ruchèchi oroszlan, ischùchi, kojega bi poserl. 1. Petri 5. 8.*

Pri vszakom zkushàvanyu je troje, na kaj chlovek dobro paziti mòra; pèrvo je nadehnènyè y nuternye podsiganye, drugo nazkladuvànyè, trèjto privolenye. Kajti vu nashoj oblažti neztoji, zevszema propèrchiti, da nebi hmàn nadehnènyà imali; zato, ako prez nashe krivnye døjdu, neszu nikakov grèh, y zàto nemòramo zaradi toga jàko zkerblyivi biti. Za hmànyem nadehnènyem szledùje nazkladuvànyè, od ovoga takàj mòremosze mi szuprot nashoj vòlyi nàglo poprijèti, tak, da nam ràzbornem nàchinem nè mogùche, chutlyivozt onoga preprèchiti; ako mi nazkladuvànyu takvomu neprivòlimo, tak niti ono takàj ne grèh; grèh vendar je taki, kak berse nazkladuvànyu privòlimo.

Med vszemi vnogovèrztznemi zhushàvanyi, kojem lyùdi jeszu podvèrseni, jeszu ona szuprot chiztòchi naj guztèsha. Nigdo nè bo-lye ovem zkushàvanyam podversen, kak mlàdi lyùdi; zàto ovi zaradi nyih ofzebùjno pazitisze y chùvati mòraju, Boga neprezràncze za miloschu prosziti, y hàbatisze, da pohlèpnozt, koja prez toga veliku moch

ima, jofche vech nepodignu. Odovud mládi lyúdi od nista bolye chúvatísze nemórajú, kak od nepazlyivoga y nechédnoga pajdáshenya z-pershónami drugoga zpolá, od knig, koje lyúbavi pripovezti y druge nezrameslivozí zadersávaju, od poszlúshanya nechizteh rázgovorov, od nepotrebno zvedlyivoga pazhenya ochih, od razvúzdaneh y nezrameslyiveh násladnoztih,

Jeszu takáj nekoja zkushávanya, kojem vechkrát pobóšni lyúdi na ízvoju veliku nepriliku y dozadáenye jeszu podvéršeni. Ova ztoje vu turóbnéh y temneh mishlényah, vu odúrneh v-pámet zabijanyah, koja nashoj razmishlénya krépozti napervo poztávlyajúsze, nyu ztráshe, mûche, y nemírnu chiné. Prozti lyúdi derše ovakva turóbná y hmánýa mishlénýa vechkrát za znaménýe sferditozti Bósje, y takáj vishepûti za chin vrásji. Znatí pako mórate, dá ovakva dugovánýa zvekshinum dohádyaju od burkanya pokvárjez ne mochrárnosztí vu chloveku, dá ovakva zrokuje nezdrava vuhkócha y kerv zlochezta, y jeszu napaztuvánýa betesnoga tēla. Vu ovakvom ztálishtu móra chlovek pri Vrachiteh tólnácha izkati, pri oveh chlovek nájde vu ovakvoj okolztojnozti vekshu pomoch, kak pri drugeh ztanoviteh lyudéh,

koji

koji ovakva dugovanja za chine vrásje derse, y z-onemi, koji takva podnáshaju, kakti od Vrága obšzedyenemi bárachu. Vnogo takáj vu tom ztoji, da, kada chlovek z-takvemi mishlènyi mùchisze, nebude taki malofzerdchen, y turoben, ar po tom zlo je gorshe, y josche vech povekshávaše.

Zadnich josche znati mórašze, dasze nahádyaju zkushávanya, koja od Boga dohádyaju, y koja on pobósnem y pravichnem pošhilya, koja vendar nészú naduszávanya na grèh, nego szamo zezvédanya pravichneh.

Jelisze takáj pobósní y pravichni, od Boga zkushávaju?

Pobósní y pravichni takáj od Boga zkushávajuszze, kada Bóg krèpozti nyihove zezvéda. 1. Po betegu. 2. Po szíromáštyu y drugeh nevolyah.

Ako chlovek vu gore zpomenútom razumévanyu zkushávanye, kakti nagibanye y naduszávanye na grèh vzeme, tak Bóg nikoga nevpekyáva vu zkushávanye. *Nigdo naj negovori, pishe szveti Jakob, akosze zkusháva, dasze od Boga zkusháva, ar Bóg nikoga nezkušáva na zlo. Jac. 1. v. 13. Nego ako Bóg z kusháva, tak to biva, da lyùdi na*

zezvédanye poztávi, jeszuli ztálni vu szvo-
 joj krépozti, ali dasze nyihova zkrivena kré-
 'pozt ochituje, y szvétu na peldu poztávi.
 Ovak vidimo mi vechpúti, da najpobošněši
 lyùdi ostro na vřzakojáchki náchin pohádya-
 juše, on puzti nye dugo ztrášnoga betega
 terpeti, puzti nye po oszebitoje nefzrechi vu
 fziromáštvo opazti, puzti nyihovo poštěnye
 po laslivom y krivom potvorěnyu hmányeh
 lyùdih vraziti. Ove y zpodobně szuprotiv-
 ehine puzti Bòg zverhu szvojeh verneh
 szlùg, da ztálnozt vernoztì nyihove zezvè-
 dā, y nyim priliku da na prelěpe krépozti,
 kaktiszu, terplívnozt, poniznozt, na vòlyu
 Bòsju zpùztchanye, zatajěnye számoga sžebe,
 molitva, pobošnozt, y zaufanozt vu Boga.

Na ov náchin zezvèdal je Bòg krépozť
 Joba, kak ovo nam szvéto Pířzmo povèda.
 Job izhájal je iz pokolěnya Ezava, ztanúval
 je vu Děrřavi Hufz, ono zkoro vřeme, kada
 Izraelczi vu Egiptushu nevòlyno szusánztvo
 terpeliszu, on bil je priprozt, Bogabojěchi,
 zlo vřzako beřal je, bil je bogat jáko, imal
 je sze tem jezer ováčz, tri jezera gamil, pět
 zto jármov volòv, pět zto oszlòv, y vnogo
 drùřine, G. Bog razveřzelil je nyega takáj
 z-szedmeni řzinmi y-tremi kchermi. Predal
 je Bòg ovoga pobošnoga chloveka Vřágu,
 dabi

dabi nyega vszakojáchkem náchinom zkushá-
val, dasze ovak krépozt nyegova ochituje,
sivlénje pako nyemu vzeti oblazt né imal.
Szabeánczi vzelíszu Jobu vsze vole y ofzle,
y potúklišzu szlúge, zbúrkanó zlo vreme
zkónchalo je vsze óvcze y chobane, Kal-
deánczi odégnalíszu gamile, y pomóрили pa-
ztire, nágli viher porushil je híšu, gdeszu
zkupa bili nyegvi szini y kchère, y vszi
bilíszu potúcheni, y od vsze ove neszreche
dobíł je Job glásza po nazveztiteleh na jen-
krat. Od falozti genyen Job razdrápil je
szvoje oprave, obril glávu szvoju, opal ná
kolena, y molil je govoréchi: *gol szem izishel
iz vútrobe moje matere, y gol pak povèrnem szè
nazád, G. Bógmi je dal, G. Bóg je vzél,
kaksze je G. Bogu dopádalo, tak je vchinyeno,
blagoszlòvlyeno budí ime Bósje.* Jobi. 1. Kada
je Vrág zapazil, da Job pri vszój szvojój ne-
szréchi proti Bogu ztálen je oztal, onda po
prepuztchényu Bósiem vudril je Joba z-mo-
zolom naj odurnèshem od pète do verhúncza
gláve, koi na gnoju szedéchi z-chrép jem
drápal je kervognójnu gubu, nekoji pako
zmed najorsheh lyúdił zespótávalíszufze z-
nyega, y izta sèna zpochítávala je nyemu
priproztóchu nyegovu y pobósní ztráh nye-
gov proti Bogu: *jeli ti jósche vu tvojoj pri-*
pro-

proztòchi oztàjes? rekla je nyemu sena: blagoszlòvi Bogu y vumri. Job nészè na to raszèrdil, negozèvszèma mìrovno rekel je nyoj: ti govoris kakì jedna zmed bedàztek sèn, akoszmo dobro od Boga prijeli, zàkaj nebi takáj zla prijeli. Ibid. c. 2. Poklam anda Bòg terplivnozt szvojega vèrnoga Joba zadovòlynò bi bil zpòznal, povèrnul je nyemu zdràvje, vchinil je nyega jòsche jenkrát tak bogàtoga kak je predi bil, dàl je nyemu pak szedem szinòv y tri kchère, y puztil je nyega do tulike ztároztì sivetì, da je detczu szvoju do chetèrtoga pokolènya videl. Ibid. c. 42.

N a v ù c h a n y e

Moji dràgi Farniki! mi chùtimo krùto jáko, kaj Job veli, *da sivrènye chloveka je vekivèchno vojuvànye na zèmlyi.* Job, 7. v. 1. Mì chùtimo zadòzta, kak szuprot vnògem zvànzkem y nuterným nepriatelom boritísze mòramo, mi zpoznávamo, da mi vù számeh nàsz najvekshega nepriatela imamo, koi je nashe tèlo, koje nema druge, nego kàstige vrèdne pohlèpnozti, koje je szusený chutlyiveh poselèny y nàszladnoztih, y vszako vreme szuprot zapovedi Bòsje, y szuprot dùsnoztjam nashem podisèsze. Ovo je, kak szvè-

szvéti Jakob veli, on nepriatel, od kojega mi najvech zkushávamosze, *vszaki zkushávafze od szvojev hmán nászladnozrih.* Jac. 1. v. 14. Pri tak vnògeh y velikeh zkushávanyah, kaj je nam vech potrebno, kak pomoch y milocha Bòsja? Prez ove milosche mi nemoremo zkushávanya preobládati, moremo pako z-pomochjum Bòsjum. Za ovu pomoch hoche Kristush, da mi Otcza nebèzkoga prosziti mòramo, kada k-nyemu molimo: *nevpèlyaj nasz vu zkushavanye.* On nam takáj, ako mi nyega zaufano proszili budemo, y nasz hotoncze vu pogibel zkushávanya nepoztávimo, szvoju pomoch nigdar neizkráti. Ako pako mi nasz számi prez szile vu pogibel poztávimo, nyu nebefimo, y vu nyoi zader-sávamosze, tak nam Bòg po pravichnom szvojem szüdu zkoro vřigdar szvoju pomoch zkratchüje. Vu pogibel hotoncze szebe poztávlyati, ter vendar hoteti, da Bòg nam vu nyoj nedá grèhu privòliti, znamènuje Boga számoga zkushávati, znamènuje, grosnyu Bòsju hoteti zahititi y zatrèti, koju on po vùztah Sziráka je poztavil: *koi pògibel lyübi, on vu nyoj pogine.* Sir. 3. v. 27. Vu tom pak ztoji ztrahovita szuprotivnozt, vu koju vnogi lyüdi opádaju. Moji dragi Farniki! jell vi nemórate ovu szuprotivnozt szebi
zpo-

zpočitávati? Vi prošízite Boga, da vasz vu zkushávanye nevpélya, metemtoga vi poztvlyate vasz neszrameslyivo y hotòncze vu takove prilike, gde nekrivnozti najvèkshèh takàj Szvétczèv lādja potrétisze y vtòpiti bi mogla, y gde Angeli kòmaj szegurni bibili. Vi znàte, kakszu za vasz pog belna ona zpoznànya, otàjna dogovàrjanya y pajdàshenya, na kakvo razpùztcheno dersànye vasz dopélyati mogu, ter vendar takova oztàviti nèchete. Vi szàmi znàte, da ztanovite lyùdi nigdàr pohàdyali nèzte, da nebi vu grèh opali bili, ter vendar ovoga pohàdyanya oztàvitisze nèchete. Vi znàte, kakszu skodlive ztanovite nàszladnozti y veszèla, kada chlovek pri nyih razpùztcheno derisze, ter vendar malozte pri nyih chedni y zkoznyivi. Vi pòznate tulike vnòge pogibeli, vi imate pèldu od jezero drugeh, kojezte vu nyih vidèli na neszrechu dòjti, y josche szada vidite, ter vendar takveh nehàbatesze. Vi znàte, da po nemertuchlyivozti vu pilu vashe tèlo vszigdàr vu veliko zbùrkanye je dòzpelo, da hmàn poselénnya vasz vszigdàr jeszu preoblàdala, y da vi pri preobilnozti vina vu nedòztojne y merzke chine opàlizte, ter vendar od takve nemertuchlivozti prèztati nèchete. Vi znàte, da
pri

pri igri vszigdâr na vkanyuvànye nàgnyeni jezte , y dasze nigdâr neigrate , da nebi vszakojàchke nàchine vkanyùvati potrebuvali , ter vendar za igrum hlepíte. Zahmàn anda preporùchatesze pod obrambu y zkerb Bòsju , ako vi iz ztràni yashe nezkerbitefze , ako vi szàmi nepazlyivo vu pogibel poztàvlyatesze. Szrechni jezte vi , ako iz vasheh presheztneh pripechèny y zlochèztoga fivlènya ovu hafzen vzèmere , dasze od szada pàzili , y chùvali budete. Amen.



RAZLAGANYE SZEDMO.

f. Od szèdme proshnye molitve Gozponove.

Od preštímàne molitve Gozponove , koja nasz Jefush Kristush zszvojemi làztovitemi vùztmi je vuchil , imam vam takàj , moji dràgi Fa-niki ! szèdmu y zàdnyu proshnyu raztolnàchiti. Ovo raztolnàchenye pochimlyem danasz , pri kojem od vasz proszim pazlyivozt vashu.

Kak

Kakſze zgovárja ſzédma proſhnya ?

Szédma proshnya mólitve Gozponove zgovárjaſze ovák : neg oſzlobódi naſz od zla.

Kaj proſzimo mi vu ſzédmoj proſhnyi ?

Mi proſzimo vu ſzédmoj proſhnyi: 1. Da naſz Bóg vlaštito od zla Dúshe, koje je gréh, oſzlobódi, y od vekivèchneſ y vremeniteſ kaſſig gréha obchiúva. 2. Da naſz Bóg od telovnóga takdj zla obchiúva, ako nebi na zvelichénye Dúhe naſhe bilo. 3. Dú nam Bóg miloſtku podà vſze ſzuprotivchine y nevalye z-terplivnoſtjum y ſtálnoſtjum podneztí.

Vu tom ztoji kratki zàvjetek ove proſhnyè, kója vnogo návuka vu ſzebi zaderàſáva. Da vi czèlu haſzen imatí morete, koju ova proſhnya vu ſzebi ima, tak proſzim da na ona, koja od nye govoril budem, pa-zku imali budete. Zlo, koje nam na ſzvétu pripetitíſze more, je dvojvèrztno, nàjmre zlo Dúshe, y zlo tēla. Pod zlom Dúshe razmèvaſze vlaštito gréh, y vſze, kaj naſz na gréh napèlyati, naſhemu zvelichényu y naſhemu vekivèchnomu blaſenztvu škódetí, y naſz vu vekivèchno zkvàrenye porinutí more. Zla tēla jeſzu vnovovèrztna, med
ove-

ovemi račúnasze vsze ono, kaj mir y pokoj sívlènya nashega bantùvati, y vremenitomu nashemu dobru naskòdeti more, n. p. beteg, sziromaštvo, szlabòcha tèla, glàd, vòjzka, kuga, zla lèta iliti pomenyka vu potrebnèh za hrànu, drasìna, szmert thovàrusha ali thovàrushicze, priatela, dobrochinitela, neszrecha od kuge pri màrhe, povodnya na polyah, pogor vu hisah y ztànnyu drugom, zatiranye szàda zemlye po nàglom vibru, tuchi y zlom vrèmenu, y jezero druga saloztna pripechènya, koja zverhu nash dójti, y nashu vremenitu cheztitozt zmùtiti y pokvàriti mogu.

Med ovem dvojvèrztneš zlam je ono Dùshe, grèh, naj vekshe. Grèh je pràvo y bitno zlo, kajti on, pòkèhdòb prokletztvo za szobum vlèche, czèlo pogublènye chloveka zrokùje, y nyemu nepreszèšni y nena-domèztlyivi kvàr doprìnàsha. Víza druga zla, koja na tèlo y ovo sívlènye vremenito zpàdaju, zkoro nemòrajusze za zlo dèrsati, akošze z-zlom grèha prizpodobe. Od ovoga jedinoga y pràvoga zla grèha proštimò mi od Boga ošzlobòditisze, kada mi vu zàdnyoj proshnyi molitve Gozponove k-nyemu govòrimo: *ošzlobòdi našz od zla*, y kada mi ove rechi zgovàrjamo, tak poleg

Razt. Kate. Ztr. II.

G

na-

nakànenya Jefusha Krístusha hoche tuliko rechi, kakti: O Gozpon y Bòg moj obchùvaj y ofzlobòdi mene od vszèh y vszakoga grèha, od szvojvòlynosti, zkùposti, ohòlnosti, gizdozti, nechiztóche, nemertuchlivozti, szerditozti, fántenya, razjadènya, blùdnosti, chalarie, làsi, krivicze, grèshue nàvade, chutlyiveh pohòtnoztih, szerdcza poselèny, hmàn prilik, pogibelih, zpàchenyih y vszega, kaj mene na grèh napèlyati more, y kaj mogućno je, mene vu grèh porinuti, koi za szobum ono neszrèchno y ztrahovito od Boga odhitchènye vlèche, koje vu vszøj vekivèchnozti je kàstiga grèha.

O dabi ovo vszigdàr mishlènye szerdcza nashega bilo, kada velimo: *ofzlobòdi nasz od zla*, ó dabi mi, kada z-vùztni-ove rechi zgovàrjavomo, vu chinu takàj iztinzku vòlyu imali, od grèha ofzlobòdyemi biti, dabi mi onu preodùrnu szuprotivnozt zkònchali, koja vu ovom dugovànyu med nashum molitvum, y nashem sivrènyem nahàdyasze. Hochemo mi ovu szuprotivnozt raztojnàchiti, vi, dràgi Farniki! vszaki dan k-Bogu govòrite, da miloscha nyegova vasz od grèha obchùva, ali zkupa, kada ovo proszite 'vi grèh. lyùbite, y nyega krèpite vu szerdczu vashem, vi lyùbite pogibel grèha, vi ztálno der-

deršitesze vù priliki greshènya, pri vafz grè-
hi jeszu zrok vřzèh vašèh chinèny, giba-
nye vřzèh vašèh terřzeny, y rãdozt vašè-
ga czèloga řivlènya; na ov nàchin pùztchate
vafz, akoprèm prořzite od grèha ořzlobòdi-
tiřze, od nyega oblãdatiřze, y vtãplyate
vafz vu propazt vřzega zla, koì je konec
grèha, y gde vi kařtigu Bòsju na vèk chùtili
budete. Raztolnàchemo řzada takàj, kaj od zla
tèla, od kojega mi vu řzèdmoj prořhnyi mo-
litve Gozponòve prořzimo od Boga ořzlo-
bòditiřze, v-pàmèt vžèti, y pàziti mòramo.

Kajřze ovoga zla dotiche, koje řzamo na
nashu vremenitu řzrechu y cheřtitozt nashe-
ga vezdàřhnèyega řivlènya zpàda, znati mò-
ramo, da ono poleg nàmere Bòsje řzvoju
veliku hařzen ima. Zla ova zrokùju vech-
krãt obèrnènye y pobòlřhanye najveksheh
grèřhnikov; rãřzipnomu řzinu odperleřzufze
ochi onda, kada mu je na řzvétu zlo ishlo,
kada je řziromãk poztal, kada je glãd ter-
pel, kada zevřžèma zahitchen, y za niřtar
dersãn je bil. Lucã 15. Vremenita zla pe-
lyaju k-Bogu, zezvèdaju nashe krèpozti, y
nye chinè zverřhène; ona jeszu prikladna
nasha chutlyiva pořelènya vtishiti, ogeny
pořòtnoztih vgãřziti, ona vuchè nařz nevo-
lye řzvéta ovoga zpoznàvati, da nařz od

prekorédne lyùbavi proti nyemu odvèrneju, ona dàvaju nam priliku, za grèhe nashe pokòru chiniti, Bogu zarad nyih zadovolyno chiniti, y prelèpe krèpozti zvershàvati, kak-ti terplivnozt, poniznozt, zpùztchanye na vòlyu Bòsju, zaùfanozt vu nyegvu otchin-zku zkerb y pomoch. Kada anda Bòg nam vremenito zlo poshilya, nészmemo, nit nemòramo mi neprilichno y doszadlyivo pro-sziti, da budemo zevszèma od nyega oszlobòdyeni, nego Boga prosziti mòramo, da nam szvoju miloschu podà, da ovakvo od nyegove Bosànzke rùkeradovolyno primemo, y da ono na zvelichènye Dúshe nashe obèrnuti hoche. Mi nemòramo zaradi telovnoga y vremenitoga zla y neszreche szlaboszerd-cheni biti, niti zdvojiti. Mi mòramo, za nasz razveszèliti y prebùditi, premiszliti, da prez ochivèztnè vòlye Bosànzke, y pre-puztchènya nyegve mùdre y pravichne pro-vidnoztì nikaj nepripètchaszè. Mi mòramo z-tvèrdnum zaùfanoztjum veruvati, da Bòg po szvojoj vszamoguchnoztì more, y poleg szvoje dobròte hoche vsze nevolye na do-bro nashe obèrnuti. Mi mòramo premiszliti, da Bòg, kada nasz kastiguje, nikaj drugo neishe nego zvelichènye nashe, y da, kada zverhu nasz nevolye poshilya, je znamenye, da

da naš lyùbi, vu tom ztoji návuk prestimà-
ni velikoga Apostola Sz. Pavla: *Moj szin-
ko!* pishe on, naj za nèmar metati kaštiguvà-
nye Gozpona, niti nezdvoj, kada od ryega
budes kaštiguvan, ar kojega Gozpon lyùbi, nye-
ga kaštiguje. *Všakoga pak szina bichuje, koje-
ga prijemlye iliti lyùbi. Ztálni budite, akošze
taki kaštigujete. Bògsze vam zkasuje kakti det-
eži: ar gde je szin, kojega otec ne kaštiguje z
Ako anda nebudete kaštiguvàni, tak budete ne-
pravèdni y ne zàkonzki szini.* Ad Hebr. 12.
v. 5. et seq. Mi mòramo nadalye premi-
szliti, da szuprotivchine y nevolye jèszu dèl
pravichneh, y da mùdro providyènye Bo-
sànzko vre tak je narèdilo, da *všzi, koji ho-
eheju pobòsno fiveti vu Kristusku Jefushu, prego-
ne terpeli budu.* 2. ad Tim. 3. v. 12. Mi
mòramo tvèrdno veruvati, da G. Bòg vèrzt-
nem drugoga pùta vu Nebo nè oztavil, nego
pùta muke. *Kajti po vnògeh tràplenyak potre-
bno je naš vlezti vu Kralyèztvo Bòsje.* Act.
14. v. 21. Mi mòramo na vekivèchno, y
zverhu všzega naj prestimanèshe blàsenzto
nebèzko zmiszlitisze, koje nam po muki na
dèl dòjde, proti kojemu všze muke malé je-
szu. *Tràpljenja szvéta ovoga nèszu prižtojna
budùchoj diki, koja vu nami budešze ochituvala.*
Ad Rom. 8. v. 18. Mi mòramo, kadašze

nam zlo dogàdya, zpomènutisze, da najvek-
 shem Szvétczem, niti iztomu Krístushu nèšze
 bolye dogàdyało, od kojega nam pripovezt
 nyegvoga sivolènya povèda, da on na ovom
 szvétu vsze fele nevòly je pretèrpel, da on
 sziromàštvo, prègone, potvàjanya, obsha-
 nènnya, pogovore, glàda, sèdyu, vruchinu,
 zimu, zamorènnye, y vsze mogùchne neprilì-
 ke sivolènya je podnèszel. Ako mi vsze ovo
 premiszlìmo, tak labko budemo ràzmeti mo-
 gli, kak krive y zlochezto mi chinìmo, ako
 mi pri vnogovèrztnekh zlih, koja od vreme-
 na do vremena zverhu nasz dohàdyaju, y
 nashu vrèmenitu szrechu bantùju, nasz szla-
 boszèrdchne y zdvojèche kàsemo, zlovòly-
 ni y neterplivni jèszmo, szuprot Bogu mer-
 mramo, y lyùdi preklinyamo.

Navùchanye.

Moji dràgi Farnìki! iz razlolnachenyih,
 koja do vezda zverhu szèdem proshnyih mo-
 litve Gozponove chinìl jèszem, vidisze, da
 ova molitva zmed vszèkh drugeh je naj szve-
 tèssha y naj hafznovitèssha. Je naj szvetèssha,
 kajti szàm Jèszush Krístush nyu nasz je vuchil;
 je naj hafznovitèssha, kajti takove proshnye
 vu szebi zadersàva, koje poleg nàmere Je-
 sush-

fusha Kriftusha nam krùto hafznovite jeshu. Odovud izpelyavafze pako, da mi nyu nigdar prevech nepotrèbujemo. Nàmera Szina Bòsjega, kada nyu nafz je navchil, bila je, da za nafz zviraliſche miloſchih, y blagoſzlova biti mòra. Ali da mi molitvu ovu nam prav hafznovitu vuchinimo, mòremoſze K-Jefushu Kriftushu vtechi, y nyega proſziti, da on, kagoder je pòchetnik ove molitve, nafz z-Dùhom ſzvojem okrèpi, y nafz vu ztaliſh poztàviti po tom dòztoja, da mi nyu poleg nàmere nyegove y po Kerſchànzki molimo. Amen.

XXXXXXXXXXXXXXXXXXXXXXXXXXXXXXXXXXXX

RAZLAGANYE OSZMO.

§. 3.

Od pozdravlènya Angèlzkega.

Molitva Gozponova, ìliti Otecz nash, kojega do vezda raztolnàchil jeshem, je molitva, koju mi izraven k-Bogu ſzàtòmu ràvnamo, y po kojoj mi nafz k-nyemu kakti pòchetniku miloſche y vſzega dobra obra-

G 4

cha-

chamo, da od nyega proſzimo, kaj nam ha-
sznovito y potrešno je. Jeſzu takaj molitve,
koje mi k-Szvêtczem kakti priatelom Bòsjem
poſhilyamo, da oni za naſz pri Bogu proſze,
koje mi zàto obchinzkem nàchinom z-Otecz
našem zкупszlàſemo, y nyemu pridàjemo.

**Kakvu molitvu Kerſcheniki Katoliki zverk-
shinum pridàvaju Otecz nashu?**

*Kerſcheniki Katoliki pridàvaju zvekshtinum moli-
tvi Otecz nash, pozdravlènye Angèlzko.*

Redu anda zvershèno je priètojno, da ja
raztolnàchenye ove tak preſtimàne, y med
Kerſcheniki Katoliki tak obchinzke molitve
raztolnàchenyu molitve Gozponove pridàm.

Kaj je pozdravlènye Angèlzko?

*Pozdravlènye Angèlzko je molitva, z-kojum mi
blàſenu Deviczu Mariu, Mater Bòſju oſze-
bujno zverhu vſzèh Angelov y Szvêtczèv poſtu-
jemo y zazàvamo.*

Maria naj ſzvetèsha Devicza y Mati Go-
zpona našega Jeſuſha Kriftuſha nè ſzamo
zpàda vu broj blàſenèh ztanovnikov nebè-
zkeh, nego ona zovelze iztinzko Kralyicza
nebezka, chàzt zaizto preſtimàna, koju ona
nè

ně fzamo po tom, da je Mati Bòsja, nego takáj zaradí prestimàneh fzvojev krèpoztih, vu kojeh vsze Angele y Szvétczza je preobládala, je zaszlúfíla. Zato anda mi szúdimó, da ona zbog izvishenozti Bosánzkoga materinztva, zbog velikeh zvershènoztih fzvojev krèpoztih, y zbog oszebújne oblazti y vrèdnosti, koju ona vu Nebu pred Angeli y Szvétczzi ima, najvekshega postuványa je vrèdna, koje jednomu chiztomu ztvorenju datíze more. Mi szúdimó poleg návuka Katolichánzke Czirkve, da nyoj, kakti ztvorenju, postuványe doizto neizgovórno y nepreszésho menyshe je dúsho, kak Bogu najvishèshemu bitju, y uaj vishèshemu Ztvorítelu vszeh ztvárih, ali vendar vnogo vekshe, kak Angelom y Szvétczzem, y da iz ovoga rávno zroka nyeina proshnya y obramba pri Bogu vnogo moguchnesha y jaksha je, nego Angelov y Szvétczzev; y da mi záto zvekshum hafznum k-nyoj vtèchemofze, nego k-Angelom y Szvétczzem, kada od Boga kaj proszimo. Vu vszeh oveh ně nikáj, kaj nebi návuku Czirkve, y temeljitój rázbornosti iztoga rázuma priztojno bilo. Da pako Kerschéniki takáj budu znali, z-kakvem náchi-
 nom, y z-kojemi rechmi ovu Bosánzku Mater postúvati y zazávati bi mórati, odrédila

je Czirkva pozdravlénýe Angèlzko kakti molitvu, koja vlaztito k-Marii rávnasze.

Kaksze zgovárja pozdravlénýe Angèlzko?

Pozdravlénýe Angèlzko zgovárjasze ovak:

Zdrava Maria, milozti puna, Gozpon je z-tobum, Blagoszlóvlyena ti med senami, y blagoszlóvlyen szád vutrobe tvoje Jes sh. Szvéta Maria, Mati Bósja, moli za nasz gréshniike szada y na vuri szmertti nashe. Amen.

Iz kulikeh ztránih je zkupzprávlyeno pozdravlénýe Angèlzko?

Pozdravlénýe Angèlzko je zkupzprávlyeno iz treh ztránih: iz pozdravlénýa Angela Gabriela; iz pozdravlénýa Jalfabèthe, y z-réchiek Czirkve.

Kak je pozdravil Mariu Angel Gabriel?

Angel Gabriel pozdravil je Mariu z-ovemi rechmi: Zdrava Maria, milozti puna, Gozpon je z-tobum, blagoszlóvlyena ti med senami.

Prilika, z-kojum Arkangel Gabriel Mariu z-ovemi rechmi je pozdravil, bilo je ono prestimáno poszlánýe, koje nyemu pri ovoj szvétoj Deviczi je bilo zaufano, da nyoj na-

zve-

zvezti, da Szin Bosji hoche chlovekom pò-
ztati, y nyu za Mater szvoju je izèbral. Ja
ovde nèchu ponávlyati ono, kaj vu dèlu
pèrvom, razláganyu ószmon zverhu tréjtoga
Vere kotriga od poszlányá Gabriela k-Marii
govoril jeszem, nego hochu szamo vam rá-
zumnozt rêchih nyegvoga pozdravlénýa raz-
tolnáchiti, da po tom právu odichenozt ove
prechizte Devicze pred ochi poztavim.

Ov Dùh nebèzki, ov od Boga poszláni
nazveztitel imenuje Mariu *milozii punu*; po
tom dáje zpoznávati, da ona med vřzemi
ztvorènyí naj bolýe z-miloschami Bosánzkemi
je nakinchena, y da Bóg nikaj ne prepuztil,
da nyu za velika szvoja odluchénýa priprávi,
za koja nyu je bil izèbral, y koja vu tom
ztojè, da ona Matì Boga y chloveka bude.
Angel rekel je nadalye k-nyoj: *Gozpon je*
z-tobum; po tom dál je rázmeti, da ona G.
Bogu vre onda drága y povòlyna, y z-nyim
oszebùjno vu velikoj lyùbavi y zaufanoztì
zjedinyena je bila. Iz oneh rêchih: *blago-*
szlòvlyena ti jeszi med senami, zpoznávamo mi,
da Maria med vřzemi senami, koje y kada
bileszu, y josche budu, naj bolýe blagoszlò-
vlyena, to jezt, naj szrechnèsha y naj blaše-
nèsha je. Y vu iztini, komu y kada tulike
milosche, y tak nenávadno prestiménýe od
Boga

Boga je dáno bilo, kak Marii? Ona med tulikemi milioni zpola szvojega je jedina, koju Bóg je zèbral za Mater Szina szvojega, y Zvelichitela szvéta. Ona je jedina, kak vnógi szvéti Otczi pobóšno veruju, prez gréha priješa bila, koi vész národ chlovechánzki je zaszmradił. Ona je bila iz oszebújne milosche Bósje od vszeh láztoviteh, y takáj najmenysheh gréhov obchùvana. Ona je prez najmenyshega ozkrùnenya divojáchtva szvojega noszécha pòztala. Ona je poròdila prez vrázenya divojáchtva y vszake boli. Szin nyein je Bóg, y ona je Mati Bósja. Kak pravo anda nyoj on prestimáni y nepreczènyeni nápiszek je láztovit, kojega nyoj Angel dáje k-nyoj govorèchi: *blagoszlòvlyena ti med senami*†

Ztrán druga pozdravlènya Angèlzkoga je od Jalsabèthe, koja bila je tecza Marie.

Kak je Mariu pozdrávila Jalsabeth?

Jalsabeth ponòvila je rèchi Angela: *Blagoszlòvlyena ti med senami*; y pridala je k-nyim szledèche rèchi: y *blagoszlòvlyen szád vùtrobe, tvoje*.

Pri kakvoj priliki ovo dogòdilosze je, hochemo mi iz szvéte pripovezti poszlùhnuti.

Vu

Vu vremenu Heròdesha Králya Judee bil je jeden Aldovnik imenom Zakáriash poleg reda poszlednikov Abiasha, y sena nyegova iz kchèrih Aarona, imenom Jalsabeth. Bili-szu pako obodvá pravichni pred Bogom, obdersavajùchi vsze zapovedi, y pravichno-zti Gozpona prez vszakoga prigovora. Y nëszu imalf szina, kajti Jalsabeth bila je ne-plòdna, y obodvá bi bili oztárelì. Jalsabeth bila je takáj blisnaya rodyákinya Marie. Pri poszlányu, koje Angel Gabriel pri Marii je dovershil, obznánìl je nyoj, da Jalsabeth, akoprèm od nárave neplòdna, y vu velikoj ztaròzti bi bila, po Bosánzkoj chudnovitoj krèpozti je noszècha, y vre doizto shèzti meszcz muskoga vùtrobe száda noszi. Kadabi to Maria bila rázmela, ishla je prek gore hitto vu. Vùrash Juda, za pohòditi teczu szvoju Jalsabèshu, y szvoju rádozt pokázati zverhu smechine vùtrobe rýeine, y da nyoj pri pò-rodu pòdvori. Kadabi vu hisu szvoje tecze vlèzla bila, pozdrávila je nyu. Y vchinye-no je, kadabi chùla Jalsabeth pozdravlènye Marie, vu onom hipu detetu, koje Jalsabeth josche pod szvojem szerdczem je noszila, dána je od Boga szvétlozt rázuma, bilo je od grèha iztochnoga ochiztcheno, y z-milo-sehum szvetoshinéhum nakincheno, predi neg-

negbisze bilo porodilo; obznánil je takáj Bóg nyemu, da Maria Szina Bòsjega, Mefziasha, Odkupitela szvéta pod szvojem szerdczem noszi; dète ovo josche vu vùtrobi matere zkriveno, zpòznalo je takáj josche vu vùtrobi Marie zkrivenoga Boga y chloveka, klanjalosze je nyemu, y od vefzelja vu vùtrobi zkákalo. Bila je takáj ono izto vreme Jalsabeth z-Dùhom szvétem napùnyena, koj takáj nyoj ochituval je ono, kajsze je z-nyeinum szinovkum Marium dogòdilo, náj-mre, da je z-Zvelichitelom szvéta noszécha; záto zakriknula je gláfszom velikem, y rekla k-nyoj: blagoszlòvlyena ti med senami, y blagoszlòvlyen szád vùtrobe tvoje. Lucæ 1. v. 5. et Seq.

Kada Jalsabeth száda, kojega Maria vu vùtrobi szvojoj je noszila, blagoszlòvlyenoga száda je imenuvala, zpòznala je po nadebnènyu Dùha szvétoga, da szád ov je on izti, koi zverhu vszega pároda chlovechánzkoga dopitano proklétztvo pravicze Bosánzke lizbriszati y odneztí hoche, vu kojem vszi národi blagoszlòvlyeni budu, y koi doshel je, da mi iz szusnyov grèha y Vrága, poztáne-mo szini y odvetki Kralyeztva nobèzkoga.

Zádnya ztrán pozdravlènya Angèlzkoga je iz rèchih, koje Czirkva je pridala.

Koje

Koje rèchi je Czirkve pridala ?

Czirkva je pridala rèchi ove: *Jesush. Szvèta Maria, Mati Bòsja, moli za nasz grèshnike szada y na vuri szmertì nashe. Amen.*

Da mi znali budemo, gdo je blagoszlòvlyeni vùtrobe Marie szád, tak je Czirkva k-rechèm Jalsabèthe pridala rèch *Jesush*. Oztále rèchi Czirkve, koje zádnyu ztrán pozdravlènya Angèlzkoga chinè, jeszu zarad verloga návuka, kojega vu szebi zadersávájú, pametiti, y obilnèshega raztolnáchenya vrèdne.

Zákaj mi velimo: szvèta Maria Mati Bòsja?

Mi velimo: szvèta Maria Mati Bòsja: kajti
 1. *Preszvèta Devicza Maria Jesusha Krifusha je poròdila, koi je pràvi Bòg.* 2. *Kajti ovo ime vu nami tvrèdnu zausanozt izbudyàva, da Bòg nye proshnya za nasz poszlákne.*

Z-ovemi rechmi vuchì nasz Czirkva zpoznavati, da Maria je Mati Bòsja. Vera ova bila je laslivomu ztráhu Bòsjemu Krivovèrnikov szuptotivna zpáchka, oszehújno pako Neztòriushu Patriárki Czarigrádzkomu. Ov
 pod-

podztüpillše je, Marii vlaztitozt Matere Bòsje szuprotivnu chiniti, y zaradi nye ochivèzto pregovárjatisze. Ali odhitila je Czirkva blúdnost nyegovu, bránila je chvèr-zto y náztójno, da Maria je Mati Bòsja, deršala je obchinzka Czirkvena zprávischa, y dokònychala, da chlovek kakti bitní y glavni kotrig Vere deršati mòra, da Maria, vu náravzkom rozumévanyu je Mati Bòsja. Ona zaizto je, kajti Jesush Kristush, koj je právi Bòg, y po kojem vsza jeszu vchinye-na od nyeinoga tèla y kervi chlovek je pò-ztal, y od nye iztinzko porodilše. Ov Je-sush je jedinoròdyeni Szin Otcza nebezkgoga, z-kojem on jedini, právi, naj vishèshi y ve-kivèchni je Bòg, on je pak takáj Szin Ma-rie, od koje on vu vremenu je chlovek pò-ztal, Bòg vendar biti nè prèztał.

Iz ovoga vendar neizpelyávafše, da mi iz Marie Bosánztvo napráviti mòramo. Ako-prém mi nyu prez dvojne za Mater Bòsju deršimo, nyu vendar mi premishlyávamo y postújemo kakti chizto ztvorènye. Metem-toga mòra vendar ime y vlaztitozt Materin-ztva Bòsjega vu nami tvèrdnu zaúfanost izbù-diti, da Bòg nye proshnyu pošzlühne, ar, kajti je Mati Bòsja, nè dvojiti, da nye pro-shnya pri Bogu Szinu nyeinomu krúto mogućna

ehna je, y biti mōra. Z-ovum zaufanoztjum genyeni zazavamo, y proszimo mi ovu presvētu Deviczu y Bosànzku Mater za nyeinu mogùchnu pomoch y obrambu pri Bogu; y velimo k-nyoj: *szvèta Maria, Mati Bosjà*, moli za nasz grèshnike szada y na vuri szmerti nashe.

Zakaj velimo mi: moli za nasz grèshnike?

Mi velimo: moli za nasz grèshnike, da Maria po valuvànyu nashe nevolye genesze, da nam Dúha pokòre, y opròztchénye grèhov nasheh od Boga izproszì.

Zalztò krùtò vellka blùdnozt bi bila veruvati, da Maria more nam grèhe odpùztchati. Ovo iztinzko je zvan nyeine mogùchnozi. Nistarmenye odpùztchénye ovo more ona po proshnyi szvojoj nam od Boga izprosziti. Ona more po proshnyi szvojoj Boga genuti, da nam szvoju miloschu podà, koja nasz gene; razszvèti; objàchi, zkrùsheno szerdcze vchini, dalze nasheh odùrneh grèshènya nàvadih oztàvìmo, nashe blùdnozi zpòznamo, y grèhov lancze raztèrgamo. Ona moresze za nasz pri Bosànzkom Szùdczu vzèti, y nyega genuti, da nam jàkozt podeli, da vsze zpachke pokòre-preoblàdamo, ztàlish grèhov

Razt. Kate. Ztr. II. H oztà

oztávimo, y nash znovich na pút pravich-
nozi poztávimo.

**Zakaj mi velimo: moli za nash szada y
na vuri szmertí nashe?**

*Mi velimo zadnich: moli za nash szada y na
vuri szmertí nashe, kajti mi vszigdar, tak
szada, kak na zkradnyoj vuri, vu kojoj zku-
shavanya vrásja guztéshe y jaksha jeszu, Bo-
sanzke pomochi potrebni jeszmo.*

Mi zadozta zpoznavamo, kak z-vnògemi
nepriateli nashega zvelichènya y nashega
blàsenztva boritisze mòramo, kulike pogibeli
mi oblàdati, od kulikeh zkushàvanyih chù-
vatísze y bràniti imamo. Nasha kerhkòcha
je nam znàna, y mi zdihàvamo, da za tulike
pogibeli gingavi jeszmo. Nam anda pri tuli-
keh pogibelih y pri tak velikoj nashoj szla-
bòchi nikaj tak nè potrebno, kak miloscha y
pomoch Bòsja. Med vszemi pako nàchini,
koje mi bi mogli potrebuvatí za zàdobiti ovu
Bosànzku pomoch, nikaj nè jakshe, niti pri-
kladnèshe, kak obramba y zàvetje Marie;
zàto mi nyu proszimo, dafze pri Bogu za
nash vzeme, y nam od nyega one milosche
zadobi, koje nam potrebne jeszu, dafze od
grè-

grèha, od pokvårjenja szvéta, od hmàn gre-shénnya prilik chùvamo, nashe dùshnoztì zpu-nyávamo, y pravo po Kerschànzki sivemo. Ofzebùjno pako y naj bolye mòramo mi Bo-sànzku Mater na vuri szmerti nashe zazàvatì, kada harczuvànye naj jakshe y naj pogibel néshe bude. Mi mòramo nyu proszìti, da ona za nasz Boga moli, da nam vu ovoj vu-ri, vu kojoj nasha szrecha ali neszrecha za czèlu vekivèchnoxt odízùdyena bude, pomo-re, nasz vu dobru potvèrdi, y blàseni ko-necz sivrènya darùje.

Iz ovoga do szada vuchinyenoga raztolnà-chenya Angèlzkoga pozdravlènya ochivezto vidisze, da ono za nasz hafznovita y Marii povòlyna molitva je, y da mi nyu vech-kràt tak za nashu hafzen, kak takàj na chàzt y postènye Marie molimo. Na to nagovàr-ja nasz nasha szvéta Mati Czirkva, pokeh-dob ona vszaki dàn vu razlùchenom vremenu Mater Bòsju z-pozdravlènyem Angèlzkem postùje.

Vu kojem ofzebùjno vremenu postùje
Czirkva Katolichànzka Mater Bòsju
z-pozdravlènyem Angèlzkem,

*Katolichànzka Czirkva poslùje Mater Bòsju z-
pozdravlènyem Angèlzkem ofzebùjno, kada v-jù-
tro, ó poldàn, y vechèr na molitvu zvonisze.*

Nàvada chez dàn trikrát, najmre v-jùtro, ó
pol dàn, y vecher na molitvu pozdravlènya
Angèlzkoga zvoneti, je jedna vu vszem Ker-
schànztvu po vszeh mèztah vpelyàna nàva-
da, koja vendar nèsze na jenkrát y zkupa
jedno vreme, nego polagàno pochèla. Zvo-
nenye na zdravu Mariu v-jùtro je vpelyal Ur-
ban ofzmi, Rimzki Papa, ó poldàn Papa
Kalixtush trèjti, y na vecher Papa Hadrian
pèt. Ovu obchinzku y szvètu nàvadu nemò-
ramo za nèmár dèrsati, nego poleg nye ràv-
natisze. Roditeli mòraju szvoju detczu za-
goda k-ovej nàvadi privùchati, y opomi-
nati, da vszaki dàn pri trojem zvonè-
nyu pozdravlènye Angèlzko na prepiszani
nàchin mole, koje ovak zgovàrjasze: *Angel
Gozponov nazvèztil je Marii, y ona prijela je
od Dùha szvètoga. Zdrava Maria. Nut!
Szlusbenicza Gozponova, hudi meni poleg rèchi
tvoje. Zdrava Maria. Y rèch tèlom pozerala,
y prebivala je med nami. Zdrava Maria. Ka-
da pako chlovek ovu Czirkve nàvadu ob-
dersàva, naj pàzi, da ovo nebiva szamo iz
nàvade.*

Iz

ràvnatíſze mòra. Mi nemoremo nashega poſtuvànya proti Materi Bòsjoj bolye pokazati, nego po vèrnom naſzleduvànyu nyeineh krèpozti. Mi mòramo terſzitíſze ſivlènye naſhe poleg nyeinoga ſivlènya ràvnati, koje je obchinzko navùchanye vſzeh krèpozti, y za vſzaki ztaliſh. Mládi lyùdi najſze od nye vuchè, kaj nyim najvech potreèbno je, najmre pravichnozt Dùshe ſzvoje, y nepreczènyeni kinch neozkrùnyene chiztòche vu ſzegùrnozt poztàviti, y zato ſzvèta, y oſzebùjno ztanovita pajdàſhenya bèfatì, y nepùztiti, dabíſze chlovek vu najmenysheh prilikah iz ſzàmoga ſzebe zpozàbil, ſzvoja chùtenya nebi ztègnul, y vſzu pogibèlnu ſzlobòdchinu nyim zakràtil, chedno y dòztojno dersànye, y ràzbornozt, koje krèpozti jeſzu najvekſhi kinch mlàdozti, vu vſzem obdersàvati. Otci y Matere najſze od nye vuchè, tak druſinu ſzvoju na rèd zpràviti, y pri nyoj ztràh Bòsji zachùvati, da detczu ſzvoju po Kerſchànzki odhràne, da iz czèle hiſe nyihove Kerſchànzko y krèpoztno ſivlènye budeſze ſzvètilo. Vſzaki, koigod je, najſze od nye vuchi, da bude proti Bogu veren, proti bliſnyemu pravèdni y iztinzki, na ſzluſbu Bòsju marlyiv, vu ſzuprotivchinah y nevolyah terpliven, ponizen, tih y krotek, chizt

chizt y pravichen; da szvoje dushozti marlyi-
vo izpunyava, szvoje poszle y delo zker-
blyivo zvershava, szvoje rukotvorztvo y
tergovinu nevtrudlyivo obavlya, dushoztjam
Kerschanzkoga y varaskoga sivilenya zadozta
chini, Bogu, y onem, koji na zemlyi Bosji
nameztniki jeszu, najmre nashem Poglavarom
radovolynu pokornost izkafemo, Bosanzke
y szvetczke zapovedi obdersavamo. Ovo
znamenuje, dragi moji Farniki! Mariu iz-
tinzko y Kerschanzki postuvati. Znamenuje
takaj, zkupa vu nyoj Boga najvekshega Go-
zpona postuvati, na kojega vsze postenye,
koje Szvetczem izkasujesze, ravnatise mora.
Amen.

Konecz Ztrani Druge.

ZAVJE.

ZAVJETEK

ZTRANI DRUGE.

RAZLAGANYE PERVO

Ztranka

Del II. od Ufanya.	5.
Razdelènyè I. Kaj je Kerščànzko	
Ufanye.	7
Razlaganye drugo	
Razdelènyè II. Od Molitve	17
§. I. Od Molitve vu občinzkom	17
Razlaganye trejto	
§. II. Od Molitve Gozponové oszebno	46
a. Od Predgovora	48
b. Od pervé proshnye Molitve Go-	
zponové	52
Razlaganye cheterto	
c. Od druge y trejte proshnye Mo-	
litve Gozponové	57
1. Od druge proshnye Molitve Go-	
zponové	58
2. Od	

2. Od trëjte proshnye Molitve Go-
zponove - - - 62

Razlaganye peto

- d. Od cheterte y pëte proshnye Mo-
litve Gozponove - - 68

1. Od cheterte proshnye Molitve
Gozponove - - 68

2. Od pëte proshnye Molitve Go-
zponove - - 78

Razlaganye Shezto

- e. Od shezte proshnye Molitve Go-
zponove - - 83

Razlaganye Szedmo

- f. Od szedme proshnye Molitve Go-
zponove - - 95

Razlaganye Ofzmo

- §. III. Od Pozdravlënya Angël-
zkoga - - 102